

M315: Landgraf Ludwigs Kreuzfahrt

0,1 den die reiner herzen guot
0,2 wesen süeze wole gemuot
0,3 den ist mit süezer rede wole
0,4 mir ist geboten daz ich sol
0,5 ein rede zuo rehte berihten
0,6 in wârem rîme verslihten
0,7 ordenlîche zuo bringen sie
0,8 als der edele vürste die
0,9 niht rehte geordenet vunden hât
0,10 dem liebet hôhes prîses tât
0,11 unde die vrouwen êren holde
0,12 mêt vernünftic haben wolte
0,13 ûf vröuweden âventiure
0,14 in sînem hûse zuo stiure
0,15 unde wile zuo lust geniezen ir
0,16 dâr zuo genâde gebe mir
0,17 der küninc der allen künigen obet
0,18 als er des iemer sî gelobet
0,19 // unde sie behegeliç ouch dâ bî
0,20 dem wolegemuoten werden sî
0,21 der mir diz werc bevolhen hât
0,22 als mich sîn wirde des niht erlât
0,23 ich wese im ein dienest hier
0,24 dem ich doch wolte dienen ie
0,25 in dînem namen Christe Jêsu
0,26 der rede wile ich beginnen nû
0,27 dô der edele êren rîche
0,28 vore gote der lobelîche
0,29 herzoge von Lutringen
0,30 volkomen an allen guoten dîngen
0,31 Gotevrit . zuo künige nû was erwelt
0,32 manlîche gemuoter als ein helt
0,33 in ire helfe der kristenheit
0,34 vore Aschalon den sige erstreit
0,35 an dem soldâne von Babilô
0,36 Clemens der hiez dâr nâch . dô
0,37 Gotevrit den heidenen vride sprach
0,38 als sie des bâten . unde dâr nâch

0,39 ietwedersît man stæte
0,40 den gelobeten vride hæte
0,41 in Jerusalêm dô ruoweten si
0,42 Robert der grâve von Normandie
0,43 mit im Robert von Flandern
0,44 mit vile hêrren den andern
0,45 ob ich ez wolte die ich wole nante
0,46 iz wûrde zuo lanc . heim zuo lande
0,47 urloup zuo dem küninge nâmen die
0,48 der sie niht gerne von im lie
0,49 er muoste sie lân si kriegten hin
0,50 noch hielten Aschalon die Sarrazîne
0,51 als ire lezzeste strît dâ vore geschach
0,52 in dem andern jâr dâr nâch
0,53 Gotevrit der prîses vile erwarp
0,54 eines gemeinen tôdes der küninc starp
0,55 den gemeine mit al der pfafheit
0,56 beweinete grôzliche die kristenheit
0,57 zuo Golgatha – als er des bat
0,58 an unsers hêrren marterstat
0,59 leite in der patriarche
0,60 in einem tiuren sarke
0,61 wart er küninliche verwieret in
0,62 nâch im sîn bruoder Baldewîn
0,63 mit aller der vürsten ger
0,64 in Edessa wart küninc gekroenet der
0,65 als er nâch hôhem prîse ranc
0,66 vile der lande er betwanc
0,67 ein manlicher helt ouch ernesthaft
0,68 im was des lîbes volle kraft
0,69 den vîanden scharpf in strîte hart
0,70 als er küninc gekroenet wart
0,71 Amalech von Arabia .
0,72 nam von im sîn rîche dâ
0,73 nâch dem Philisteus
0,74 Aschalon unde Tyrus
0,75 wolten im zuo dieneste leben
0,76 unde wurden sîne zinsgeben
0,77 der keiser ûz Kriechenlande
0,78 vile rîchheit er im sande
0,79 sîn wârer helfær jach sich der sîn
0,80 zuo einem sune im welte er in
0,81 Dâvît von Armenia
0,82 unde der küninc von Avenia
0,83 seltsæne kleinôte . unde gâbe rîche
0,84 si sanden im unde gâben sich
0,85 ire vürsten die Chorrozani
0,86 die Persen unde die Mêde

0,87 im sanden durch sîne werdicheit
0,88 sie lobeten sîn im bereite
0,89 Prothi die en wolten in
0,90 vürnamens niht einen mennischen sîn
0,91 sunder er wære Mars der got .
0,92 an den sie warten in strîtes nôt
0,93 er wære ouch ire got der kristenheit
0,94 mêt vermæret was sîn werdicheit
0,95 über den Nilum unde über daz rôte mer
0,96 dô er mit sînem werden her
0,97 reit von Edessa . der stat
0,98 dâ man in gekroenet hât
0,99 unde zuo Jerusalêm er wolte
0,100 als man in bestâtigen solte
0,101 zwischen Neapolis unde Antioch
0,102 die heidene im vîande wâren noch
0,103 si hetten kraft unde vile was ir
0,104 wole mügen nû daz sprechen wir
0,105 daz der erwelte Baldewîn
0,106 ein mannelich helt ist gesîn
0,107 veste gemuot ein vürste
0,108 in vollem getürste
0,109 durch der vîande lant er reit
0,110 die durchvart was im doch verseit
0,111 vore . von den Sarrazînen
0,112 Baldewîn dô hæte der sînen
0,113 im ûf den wec ûz gesundert
0,114 niur vierzic unde hundert
0,115 rittere manlich unde vestegemuot
0,116 geriten starc ûf orsen guot
0,117 ouch alsô manigen gênten man
0,118 vore eineme gebirge was ein plân
0,119 ûf deme die heidene mit kraft
0,120 lâgen mit voller ritterschaft
0,121 als dâ des küniges warten si .
0,122 daz gebirge genant ist Perithi
0,123 durch die enge muoste Baldewîn
0,124 dô er nû was sô nâhen in
0,125 kumen daz er wole markte die
0,126 vîande . unde ouch in sâhen sie
0,127 hundert tûsent wâren der
0,128 in gotes namen mit in streit er
0,129 hier zuo gehôrte rede vile
0,130 die ich durch kürze lâzen wile
0,131 wen got half Baldewînen
0,132 daz er unde di sînen
0,133 mit sô kleiner ritterschaft
0,134 an gesigeten sô starke der heidenschaft

0,135 vlühtic wurden vore im die
0,136 er jagete in nâch erslagen . sie
0,137 wurden von im daz mêrer teil
0,138 die andern tiefer wunden meil
0,139 als die kristene sie niht sparten .
0,140 vuorten war sie kârten
0,141 mit dirre kleinen ritterschaft
0,142 hin zuo Sion twanc er zinshaft
0,143 die lant gar biz an Bersabê .
0,144 er erwarp dâ prîses mêr
0,145 Marthimam die guoten stat
0,146 strîtlîche er gewonnen hât
0,147 von der an daz wazzer Albana
0,148 die heidene er im neigete dâ
0,149 der vile daz leben doch verlôs
0,150 von Albana über zuo Orchardôs
0,151 von danne biz zuo Rubim
0,152 zwischen Joppen unde Philistim
0,153 Tyre des ledic vore im beleip
0,154 doch die heidenschaft er dâ vertreip
0,155 waz der niht tôt wart geslagen .
0,156 noch sich ergâben ich wile iuch sagen
0,157 mit namen die stete die er gewan
0,158 unde tet sie gote undertân
0,159 an der vart gegen Jerusolimis
0,160 Arkas . dâr nâch Tripolis
0,161 die vermæрте stat Biblium
0,162 Sidon vore der Berihtum
0,163 Akers dâr nâch Kaiphas
0,164 Cêsarea ir ouch eine was
0,165 in Akers dirre gotesman
0,166 die burc Schandalun er gewan
0,167 er gewan Joppen unde Assur
0,168 dâr nâch vore Künigesberc er vuor
0,169 die er gewan . er tet noch mêr
0,170 er gewan den turn in Silôê
0,171 die burc Malve ein vestez werc
0,172 er gewan . unde dâr nâch Kainsberc
0,173 in Philistim Pharan
0,174 die stat er sturmlîche gewan
0,175 er hæte nû volkes grôze kraft
0,176 unde gar werlîche ritterschaft
0,177 Pharan lac nâhen dem Nilô
0,178 in eine suht viel der hêrre dô
0,179 als in got haben wolte
0,180 unde er niht mêr hier solte
0,181 wesen in dirre jâmericheit
0,182 unser hêrre nâch sîner arbeit

0,183 nâch der sigenumft zuo lône
0,184 wolte im des siges krône
0,185 in der himele Jerusalêm
0,186 bestæten dô dechein arbeit is
0,187 sunder vrôuwede âne alle jâmericheit
0,188 ruowe âne alle arbeit
0,189 // dirre küninc gote getriuwe
0,190 mit voller bîhte . mit ganzer riuwe
0,191 gespîset mit dem lebenden brôte .
0,192 ûf gap er die sêle gote
0,193 wie grôzlichen swære
0,194 umbe in betrüebet wære
0,195 die lobelîche kristenheit
0,196 mit vürsten mit der pfaheit
0,197 in volklagender jâmericheit
0,198 niht gar wirdet iuch daz geseit
0,199 // als vore lebente der werde
0,200 mit vollem vlîze des gerte
0,201 wie an tugenden der vürenæme
0,202 zuo Jerusalêm er quæme
0,203 mit êren als er solte
0,204 sîn küninlich reht dâ holete
0,205 alsô in in die stat
0,206 brâht tôten mit êren hât
0,207 der patriarche unde doch in jâmericheit
0,208 die bischove mit der pfaheit
0,209 nâch kristenlichem rehte dô
0,210 des êrsten zuo dem templô
0,211 als im daz ambahte dâ geschach
0,212 zuo dem spitâl sie truogen in dâr nâch
0,213 mit gesange doch in ungehabe
0,214 dâr nâch zuo dem heiligen grabe
0,215 von danne ûz zuo Golphatha
0,216 Baldewînen sie begruoben dâ
0,217 an werdicheit den klâren
0,218 nâch sibenzehen jâren
0,219 unde vürebaz drîer mände mêt
0,220 als er in Edesse
0,221 wart gekroenet werdiclîche
0,222 zuo Jerusalêm deme rîche
0,223 iz hæte der küninc Baldewîn
0,224 einen werden mâc sîn
0,225 gegeben zuo hêrren der stat
0,226 Edesse . der mit hôher tât
0,227 hæte erworben daz man in
0,228 sagete einen den bezzisten ritter sîn
0,229 als in die kristenheit dâ hæte
0,230 vile leides er den heidenen tet

0,231 er hiez ouch Baldewîn von Burgô
0,232 den nâmen mit vollem râte dô
0,233 von Edessa die vürsten sie kuren in
0,234 zuo hêrren unde küninc solte er sîn
0,235 unde gewaltic ûf Sione
0,236 mit êren nam er die krône
0,237 Sion der berc genennet is
0,238 ûf den Jerusalêm
0,239 ist gebûwet dirre Baldewîn
0,240 ein mannelich helt ist er gesîn
0,241 in allen wîse gar lobelich
0,242 was er vore . deme rîche
0,243 ein mannelich helt gewære
0,244 den Sarrazînen gevære
0,245 küene . milde . zuo gote wîs
0,246 des vuorte sîn name noch hôhen prîs
0,247 der heidenschaft betwanc er vile
0,248 hier mit ich in lâzen wile
0,249 als er genendlicliche
0,250 verrihtet hæte daz rîche
0,251 unde er daz himelrîche erwarp
0,252 nâch dem zehenden jâre er starp
0,253 nâch im was als ich iuch sage
0,254 grôz weinen er wart mit voller klage
0,255 nâch küninlichem werde
0,256 gegeben der erde
0,257 zuo Golgatha dâ Jêsus Krist
0,258 durch uns gekriuziget ist
0,259 als diz ergienc niht lanc dem nâh
0,260 die vürsten mit vrâge suochten dâ
0,261 ob dâ noch wære ieman
0,262 der mit der sippe züge an
0,263 Gotevriden . daz er vore quæme
0,264 die krône daz rîche næme
0,265 sie wolten in zuo hêrren hân
0,266 die mâcschaft zôch sich nieman an
0,267 âne küninc wolten si niht sîn
0,268 si wurden zuo râte sô under in
0,269 ire boten die hêrren sanden
0,270 den vürsten zuo diutischen landen
0,271 daz einen küninc in gæben die
0,272 gemeine des begerten sie
0,273 ire bete snell dâr an geschach
0,274 Fulkonem von Andernache
0,275 einen hêrren wîs von arte hôh
0,276 übersanden sie in dô
0,277 an dem man niht niur wurde vant
0,278 er was mâc des küninges von Ængellant

0,279 mannelîch ein ritter ûzerwelt
0,280 als man sprichet ein wârer helt
0,281 milde . wîse . wârhaft
0,282 er wart ein schûr der heidenschaft
0,283 der er sît vile von lîbe tet
0,284 zwêne süne Fulko hæte
0,285 Baldewînen unde Almerîch
0,286 mit den er übermohte sich
0,287 ouch mit êrlîcher ritterschaft
0,288 werlich unde manhaft
0,289 als der hêrre über quam
0,290 die kristenheit in gerne nam
0,291 sie entviengen in lieplîche
0,292 gekroenet zuo dem rîche
0,293 wart er mit grôzen êren .
0,294 bî im begonde sich mêren
0,295 die kristenheit . die heidenschaft
0,296 nam abe . grôzlîche an ire kraft
0,297 an in er prîses vile erwarp
0,298 ouch den himellôn . dô Fulko starp
0,299 unde er mit êren wart begraben
0,300 als die künige ire reht des haben
0,301 nû was der edele Fulko
0,302 dem rîche vore gewesen sô
0,303 diz wolten sie im zuo êren tuon
0,304 die vürsten Baldewînen sînen sun
0,305 krônnten unde kuren an in
0,306 gewîhet zuo künige wart er in
0,307 ein unheilsame pîne
0,308 unde ein hagel der Sarrazîne
0,309 die wîle er lebete sô was der
0,310 kurzlîchen doch starp er
0,311 in klagete starke die kristenheit
0,312 mit êren zuo grabe wart er geleit
0,313 under einen tiurlîchen sarc
0,314 dâr an sînes namen marc
0,315 man vant geschriben aldâ man las
0,316 wie er an tugenden blüejente was
0,317 nâch im an daz rîche
0,318 sie nâmen Amelrîche
0,319 Baldewînes bruoder der ouch daz
0,320 in voller wirde besaz
0,321 zuo wîbe er eine grævinne
0,322 nam . sie was sîn mâginne
0,323 er tet ouch wê den heidenen
0,324 sît er muoste sich scheiden
0,325 von ir daz gap in geistlich reht
0,326 unde ire sippe die rede ist sleht

0,327 doch alsô daz haben gelesen wir
0,328 zwei kint hæte er mit ir
0,329 einen sun der hiez ouch Baldewîn
0,330 unde Sybillam ein juncvröuwelîn
0,331 // als die scheidunge geschach
0,332 über eteslîche jâr dâr nâch
0,333 dirre küninc Amelrîch
0,334 mit Manuhêle er vriunde sich
0,335 dem künige von Kriechenlande
0,336 sîn nâh mâginne im der sande
0,337 die im mit grôzen êren quam
0,338 Amelrîch si zuo wîbe nam
0,339 mit der er eine tohter hæte
0,340 Isabel der name stêt
0,341 dô Amelrîch an disem lebene
0,342 hæte den geist ûf gegeben
0,343 ouch nâch grôzer arbeit
0,344 die er in gotes dieneste leit
0,345 unde er zuo grabe was geleit
0,346 nâch der künige gewonheit
0,347 zuo künige den sun sînen
0,348 man krônte Baldewîn
0,349 sînes muotes allen liuten sleht
0,350 manlich wîse dâ bî gereht
0,351 als ein hōvisch maget gar zūhtic
0,352 der hêrre was miselsūhtic
0,353 daz woste an ime Baldewîn
0,354 âne wîp er wolte sîn
0,355 unde leben kiuschlîche
0,356 grôzer tugende rîche
0,357 er was . unde ouch von grôzer tât
0,358 ein mildez herze er hât
0,359 senftmüetic wole gesitet
0,360 ûf lange jâr was iz gevidet
0,361 zwischen im unde den heidenen
0,362 unde daz von in beiden
0,363 vervestenet unde gemachet alsô
0,364 daz iz was stæte ez was ouch dô
0,365 der zît bî im ein grâve wert
0,366 der hōhen prîs unervært
0,367 mit manlîcher ritterschaft
0,368 hæte erworben an der heidenschaft
0,369 Willhalm was von grôzer tât
0,370 der markgrâve Kuonrât
0,371 sîn bruoder was von – Montferra
0,372 der hêrre was ouch der zîte dâ
0,373 der êrlîche küninc Baldewîn
0,374 Sybillam die schoene swester sîn

0,375 mit magedtuomlîchem lîbe
0,376 Willhalme er gap zuo wîbe
0,377 die grâveschaft zuo Joppen mit der
0,378 wole mohte sich des vrôuwen er
0,379 Sybilla wart swanger unde gebar
0,380 einen sun schoenen gar
0,381 Willhalm man ouch toufete in
0,382 der vater sich vrôuwete des sunes sîn
0,383 der doch kurzlîche starp dâr nâch
0,384 an im grôz schade dô geschach
0,385 unde leide Baldewîn
0,386 den jungen oeheim sînen
0,387 hæte er liep von herzen gar
0,388 dô der gewuohs in daz zwelifte jâr
0,389 dâ krônte zuo künige Baldewîn
0,390 von Tripole bevalhe er in
0,391 dem grâven Reinmunde
0,392 zuo huote als er im gunde
0,393 wole guotes . dô was er wole bewart
0,394 mit Reinmunde . dâ was von hôher art
0,395 von Lilingen geboren ein ritter guot
0,396 des lîbes schoene manlîche gemuot
0,397 des guotes arm . zuo manne kôs in
0,398 von Joppen die grævinne .
0,399 Sybilla . iz was ire bruoder leit
0,400 der kurzlîche an der ûzsetzicheit
0,401 starp . er wart zuo Golgatha
0,402 geleit niht überlanc dâr nâh
0,403 als in wolte haben got
0,404 lac Willhalm der junge tôt
0,405 der als daz heischet küninlich art
0,406 mit grôzen êren bestatet wart
0,407 doch mit voller jâmericheit
0,408 bî die künige hin geleit
0,409 Sybilla was sinnen rîche
0,410 dâr nâch kurzlîche
0,411 an Heracliô sie daz gewan .
0,412 unde an die vürsten . daz ire man
0,413 Gwidô zuo künige wart gekoren
0,414 gekroenet . daz was dem grâven zorn
0,415 von Tripole Reinmunde
0,416 wan er noch voremunde
0,417 was des rîches unde man hât
0,418 gekroenet in âne sînen rât
0,419 Gwiden unde sîner wirtinne
0,420 Reinmunt ire vîant des wolte sîn
0,421 ire schaden er warp wâ er daz
0,422 vermohte . er was in starke gehaz

0,423 von Monterâl der vürste Reinolt
0,424 bî – Reinmunde des ligen wolte
0,425 den vride den bî stæte
0,426 der getriuwe Baldewîn hæte
0,427 Sybillen bruoder mit der kristenheit
0,428 unde mit den heidenen den versneit
0,429 wer wile im des wesen holt
0,430 von Monterâl grâve Reinolt
0,431 mit einem roube den er nam
0,432 dâ von grôzer jâmer quam
0,433 von Babilône der soldân
0,434 Salatîn alle sîne man
0,435 er besande in al der heidenschaft
0,436 vore Jerusalem vuor er mit kraft
0,437 Gwidô mit den sînen
0,438 streit mit Salatînen
0,439 niht wole iz dô den kristenen gie
0,440 ich meine den sige verluren sie
0,441 gefangen wart Gwidô –
0,442 mit im alle die vürsten dô
0,443 swaz er der in dem strîte hâte
0,444 Salatîn gewan die stat
0,445 Jerusalem . mort dâ ergienc
0,446 swen er wolte den vienc
0,447 er . die andern sluoc man tôt
0,448 als in daz Salatîn gebôt
0,449 alle die hûs . unde gar die stete
0,450 swaz sô der küninc der inne hæte
0,451 sunder Surs aleine die gewan
0,452 mit kraft der soldân
0,453 eteslîche er hielt eteslîche er brach
0,454 den roup er ungevuoge rach
0,455 den Reinolt niht wole genomen hât
0,456 unsers hêrren kriuze von der stat
0,457 Jerusalem nam Salatîn
0,458 unde vuorte iz mit im hin
0,459 nôit leit nû die kristenheit
0,460 von der zît daz die mennischheit
0,461 got unser hêrre entvie
0,462 als daz zuo sælden uns ergie
0,463 sô hetten sich des ergangen aldâr
0,464 tûsent unde hundert jâr
0,465 siben unde ahtzic dâr nâch
0,466 daz leit der kristenheit geschach
0,467 die hæte nû vestenunge niht mêt
0,468 niur Surs die hiez vore Tyre
0,469 der markgrâve Kuonrât
0,470 – von Montferran quam der stat

0,471 zuo helfe . unde dâ der kristenheit
0,472 von der er ofte bestreit
0,473 die heidene er tet in grôzen schaden
0,474 si wâren starke mit im verladen
0,475 als ein man ein wærlîch helt
0,476 er werte in wazzer unde alle velt
0,477 swâ sô si im erbuten sich
0,478 dâ gesigete er an in manlîche
0,479 er hæte doch niht grôzes hers
0,480 in dem herzen des mers
0,481 liget Surs . nû quâmen die mære
0,482 wie grôzlîchen wære
0,483 bekumbert die kristenheit
0,484 in die werlt unde waz di jâmers leit
0,485 von den heidenen über mer
0,486 wie daz sie hetten kleine wer
0,487 daz erwegete swærlîche
0,488 hier alle der kristene rîche
0,489 daz volc der mære betrüebet wart
0,490 eteslîche lobeten die übervart
0,491 zuo helfe dar kumen der kristenheit
0,492 der verte die êrsten wâren bereite
0,493 die manlîchen Lampartære
0,494 als die edelen Rômære
0,495 Venediære
0,496 unde Genuære
0,497 ouch ander stete vile mit in
0,498 die starc ouch in Lamparten sîn
0,499 mit einem werlîchen her
0,500 versolt sie quâmen über mer
0,501 worden ledic ûz ire haft
0,502 der geunêrten heidenschaft
0,503 was niuwenes der küninc Gwidô
0,504 dise geste entvienc er vrô
0,505 Gwidô hæte zuo helfe noch
0,506 die vesten – unde Antioch
0,507 Tripole kârte wider an in
0,508 unde wolte im zuo helfe sîn
0,509 der küninc Gwidô suochte rât
0,510 an markgrâven Kuonrât
0,511 von Montferra unde bat in
0,512 daz er sîn helfær wolte sîn
0,513 dô riet im der markîs
0,514 als er was der sache wîs
0,515 daz er vore Akers legerte sich
0,516 der rât was behegelich
0,517 in allen . alsô si wâren dâ .
0,518 Akers Phtolomaidâ

0,519 hiez vore . diz was ir aller küre
0,520 sie quâmen ritterlîche dâ vüre
0,521 der küninc unde al die sîne
0,522 ouch die werden Lampardîne
0,523 der gezelt sach man dâ rîche
0,524 ûf geslagen . kostlîche
0,525 was sîn allez erdâht
0,526 waz sie mit in hetten brâht
0,527 zuo der stat manlîche
0,528 dicke sie versuochten sich
0,529 unverdrozzen mit ire ritterschaft
0,530 sô was zuo kleine ot noch ire kraft
0,531 die Sarrazîne krefticlîche
0,532 die stat werten unde manlîche
0,533 Salatîne von Babilô
0,534 quâmen nû des di mære dô
0,535 gegen den kristenen zuo wer
0,536 mit gar kreftigem her
0,537 er quam . nû gedâhte der soldân
0,538 gewis sie alle gevangen hân
0,539 unde wie si gereite wæren sîn
0,540 er sprach “ir kumet decheiner hin”
0,541 iz wære ouch in geschehen sô
0,542 ir was zuo kleine nû sehete wâ
0,543 unser hêrre in helfe sande
0,544 von dem mer zuo lande
0,545 sie sâhen kumen kocken – kiel
0,546 galînen barken sigelten vile
0,547 dâr ûfe volkes grôze kraft
0,548 mit gar werlîcher ritterschaft
0,549 als got zuo trôste gap die disen .
0,550 in quâmen vile der Tenen ouch der Frisen
0,551 Normane Schotten unde noch mêr
0,552 von allen landen alumbe die sê
0,553 werlich zuo strîte gar
0,554 sie quâmen in Kristes êre dar
0,555 die mit êren Gwidô
0,556 entvienc er was ire künfte vrô
0,557 under in als ich iuch sagen wile
0,558 werlich ir quam zuo vuoze vile
0,559 der Frisen als sie des haben siten
0,560 der minner teil was der geriten
0,561 ûz den andern die grôzesten schar
0,562 wole georset quâmen dar
0,563 dise sich hielten sunderlich
0,564 in viere daz her dô leite sich
0,565 künige Gwiden was sîn schade leit
0,566 unde ouch der gebreche der kristenheit

0,567 er suochte helfe unde rât
0,568 an dem markgrâven Kuonrât
0,569 von Montferra wande er wiste in
0,570 alle zît zuo solichen noten sîn
0,571 endehaftes râtes wîse
0,572 er sprach “ei werder markîs
0,573 ich klage iuch mîne grôzen leit
0,574 noch mêr die nôt der kristenheit
0,575 ir wizzet wole wie grôzlîche
0,576 die hât beswæret . unde mich
0,577 von Babilô Salatîn
0,578 nû sprechet waz mac daz wægeste sîn
0,579 der kristenheit unde mir
0,580 wolten – uns an im gerechen wir
0,581 daz got des sî geêret
0,582 ir hoeret wole wie er kêret
0,583 an uns mortgîtigen haz
0,584 unde trahtet stæte wie daz
0,585 er verderbe die kristenheit
0,586 ich klage iuch niht eine mîne leit
0,587 sunder gotes . unde ouch der muoter sîn
0,588 der hôhen himelkûninginne
0,589 ir hoeret wie allertagelîch
0,590 er in zuo lastere samenet sich”
0,591 dô sprach der hêrre von Montferran
0,592 “iz bezziste wære iuch getân
0,593 hætet ir des volle kraft
0,594 unde ouch an der ritterschaft
0,595 daz ir gewinnet dise stat
0,596 sô man her gelegert hât”
0,597 “gevellet iuch daz” sprach Gwidô
0,598 “jâ” sprach der markîs . dô
0,599 sprach der küninc . “uns kumet noch
0,600 der prinze von Antioch
0,601 unde küninc Lewe der manlîche
0,602 von Ubîâ der lobelîche
0,603 in strîte . umbe der kristene nôt
0,604 sich harte er ie den vîanden bôt”
0,605 alsô ein ende nam der rât
0,606 dô reit markgrâve Kuonrât
0,607 heim zuo Surs in sîne stat
0,608 ich wæne er brieve entvungen hât
0,609 von dem soldâne heimelîche
0,610 Gwiden niht vrumulîche
0,611 sît sagete man die sîn .
0,612 des man dâr nâch schuldigete in
0,613 ein êrlich her Gwidô hât
0,614 nû vore Akers der stat

0,615 noch quâmen im liebe mære
0,616 wie daz überkumen wære
0,617 ûf dem mer wærlîche
0,618 der edele êrlîche
0,619 sînen vriunden der suoze gemuote
0,620 den vîanden der unguote
0,621 der vornêmer . werder . milder .
0,622 den untugenden der wilder
0,623 den tugenden geheim . der wîse .
0,624 volkomen an liehtem prîse
0,625 an vürstlîchen arte
0,626 nâch êren der wole gebârte
0,627 in strîte des muotes veste
0,628 ein ritter er was der bezziste
0,629 als man in bî sînen zîten vant
0,630 im gewarte willic der Düringe lant
0,631 dâr inne gar die ritterschaft
0,632 er hæte got gevorht von aller kraft
0,633 sînes herzen . Adelheit hiez sîne wirtinne
0,634 Ludewîc was der name sîn
0,635 der lantgrâve von des landes kraft
0,636 des im was die hêrschaft
0,637 an voller gebiete
0,638 ein vîant der heidendiete
0,639 der êrlîchen kristenheit
0,640 er quam zuo grôzer sælicheit
0,641 zuo êwigen pînen
0,642 den geunêrten Sarrazînen
0,643 die er warf an daz gevelle
0,644 der bitterlîchen helle
0,645 dâ vore uns got behüete
0,646 durch alle sîne güete âmên
0,647 des lop zuo wîtem vluge vert
0,648 vürstlîcher wirde unversêrt
0,649 der erbeizete von dem mer
0,650 ûz den schiffen mit sînem her
0,651 vore Tyre die man nennet Surs
0,652 ich denke alsoliches nâhgebûrs
0,653 unde sîn bîwesenes gerne
0,654 wolten dâ entberen
0,655 die Sarrazîne mohte iz in
0,656 geschehen . si liezen ez alsô sîn
0,657 der markgrâve Kuonrât
0,658 den lantgrâven in die stat
0,659 mit allen den sînen dô
0,660 lieplich entvienc unde vrô
0,661 als daz zam sîner werdicheit
0,662 bî einander wart in geleit

0,663 die herberge unde gegeben
0,664 nâch einer zîl daz was in eben
0,665 den gesten unde was ire wille wole
0,666 als man lieber vriunde sol
0,667 pflegen unde schaffen rât
0,668 alsô der vürste Kuonrât
0,669 den êrsten tac die naht dem nâch
0,670 mit grôzem vollene sie besach
0,671 iz mohte wole sîn unde hette vuoc
0,672 ietwederhalben was sîn genuoc
0,673 dise rede ich meine sô
0,674 als iz der wirt vermohte dô
0,675 er wirte sie vroelîche gemuot
0,676 daz nâmen die geste gar vor guot
0,677 in genuogete guot was ire gemach
0,678 an dem andern tage dâr nâch
0,679 als er was sîner künfte vrô
0,680 quam der küninc Gwidô
0,681 vore Surs erbeizte er ûf daz velt
0,682 nâhen der porte sîn gezelt
0,683 gegen den schiffen zôch man ûf
0,684 alsô daz der küninc schuof
0,685 der en wolte niht in die stat
0,686 in en lüede der vürste Kuonrât
0,687 der wirt dâ træge gebârte zuo
0,688 der küninc die schif wole markte nû
0,689 wie die bereite wâren zuo lobe
0,690 unde wie der einem swebete obe
0,691 ein banier von pfelle lâsûrvar
0,692 dâr in ein lewe lustiger gar
0,693 gesniten rôt dâr under wîz
0,694 als der meister dâr an legete vlîz
0,695 des zeichenes hundert schilde alsô
0,696 dâ bî der küninc markte dô
0,697 des hêrren her unde sîne maht
0,698 wie er hæte hundert ritter brâht
0,699 âne die den gehörten zuo
0,700 bereite was der lantgrâve nû
0,701 abe er zuo dem küninge reit
0,702 daz wolte an im sîn hövischheit
0,703 als er was tugentlîcher site
0,704 im reit sîn werder bruoder mite
0,705 der prîses gernte Herman
0,706 vile grâven vrîen dienstmanne
0,707 vile werder ritter die ich her nâch
0,708 iuch nennen sol der küninc nû sach
0,709 sie abe rîten von der stat
0,710 di hêrren er mite rîten bat

0,711 die werden geste entwâhen
0,712 daz wart mit willen getân
0,713 lieplîchen unde vrô
0,714 di geste wurden entvângen dô
0,715 von dem künînge unde al den werden gar
0,716 als si hæte brâht der künînc dar
0,717 daz wart in vergolten suoze
0,718 mit hövischem widergruoze
0,719 dise zwêne von art die klâren
0,720 daz sie gebuoder wâren
0,721 daz bewîste ire gelîch gestalt an in
0,722 ouch einer gebâre sie sîn
0,723 gewesen ire site tugentlich
0,724 ebenes muotes manlich
0,725 des lîbes starc volkomen gar
0,726 an al ire liden lichtgevar
0,727 was ire aneschouwen brûnreitez hâr
0,728 stæte an ire worten wâr
0,729 vollic ûf gewahsen hôch
0,730 mit in erbeizte Gwidô
0,731 vore sînem gezelte – er sich
0,732 satzte mit in klagelich
0,733 der betruobte künînc Gwidô
0,734 sîner rede begonde alsô
0,735 “gelobet sî der starke got
0,736 er hât sînes volkes nôt
0,737 veterlîche mit iuch bedâht
0,738 unde ouch mich . der iuch uns brâht
0,739 hæte zuo helfe . iuwer kunft
0,740 ist unser gewisse sigenumft”
0,741 aber sprach der künînc dô
0,742 “der soldân von Babilô
0,743 hât mir unmæzige leit
0,744 an der gotes kristenheit
0,745 getân . alsô iz uns ergienc
0,746 an eineme strîte er mich vienc
0,747 unde gar die bezzisten die mit mir dâ .
0,748 zuo velde wâren dem strîte nâhe
0,749 waz der bezzisten gevangen was
0,750 ûz den andern er die las
0,751 in sîne haft nam er die
0,752 toeten er die andern lie
0,753 under den manic werlich man
0,754 der kristenheit ist abe gegân
0,755 Jerusalêm er gewan
0,756 daz heilige kriuze nam er von dannen
0,757 noch tuot er tagelîche leit
0,758 unmæzige der kristenheit

0,759 nû sît ir hêrre uns kumen hier
0,760 lâzet uns vernemen wie
0,761 ir hier zuo gebâren wellt”
0,762 unverzaget als ein helt
0,763 sprach der lantgrâve dô
0,764 “hêrre ich bin kumen sô
0,765 mit mir mîn bruoder Herman
0,766 ouch swaz wir der unsern hân
0,767 daz wir âne betrâgen
0,768 in Kristes êre wâgen
0,769 als er vergôz durch uns sîn bluot
0,770 wollen den lîp . zern daz guot
0,771 vrô . unde willic gemuot
0,772 swaz der soldân zuo unêren tuot
0,773 gote unde sîner kristenheit
0,774 daz ist uns in gote leit
0,775 alsô verre sô wir ez vermügen
0,776 unde wir zuo wer gegen im tügen
0,777 sô wellen wir im bewîsen daz
0,778 ist er uns vîant unde gehaz
0,779 daz selbe hât ouch er von uns
0,780 durch die liebe des gotessunes”
0,781 dirre rede wole vrô
0,782 wart der küninc . aber sô
0,783 sprach der lantgrâve “saget mir
0,784 sît vriunde . der markgrâve unde ir”
0,785 der küninc sprach “vürnamens sîn
0,786 vriunt ich genzlîchen bin”
0,787 “wile er iuch helfen .” aber sâr .
0,788 vrâgete in der lantgrâve . dâ
0,789 sprach der küninc “ganzlîche
0,790 niht wole zuo helfe er stellet sich
0,791 noch er hât uns helfe versaget
0,792 dô ich im niuwenes vore Akers klagete
0,793 der kristene leit mîne nôt
0,794 niht mêr trôstes er mir bôt
0,795 niur daz er sprach ez ist mîn rât
0,796 vermüget ir ez sô besizet die stat”
0,797 “// alsô sol daz niht sîn”
0,798 sprach der lantgrâve . “wir sulen in
0,799 umbe helfe biten er ist des wert
0,800 hât in ieman beswært
0,801 oder betrüebet dechein man
0,802 durch die gotes liebe daz lân
0,803 ouch durch unser bete er sol
0,804 wir durfen sîner helfe wole”
0,805 mit dem lantgrâven Gwidô
0,806 zuo dem markgrâven riten dô

0,807 umbe helfe sie bâten in
0,808 die er gar versagete in
0,809 dâr under doch rede vile geschach
0,810 beidersît . der markgrâve sprach
0,811 “ich habe genzlîchen . mit
0,812 dem soldâne . mich gevidet
0,813 daz ich im stæte halten wile
0,814 der küninc hât ritterschaft vile
0,815 er entbiret nû wole der helfe mîn”
0,816 noch versuochte sich sunderlîche an in
0,817 der lantgrâve mit starker bete
0,818 als er im vore gesaget hæte
0,819 in der rede stuont er vaste
0,820 der wirt . der edele sîn gast
0,821 wart starke des betrüebet dô
0,822 als wart ouch küninc Gwidô
0,823 dâr under in der lantgrâve bat
0,824 daz er muoste in sîner stat
0,825 sîn guot zern dâ
0,826 der wirt sprach guotlîchen jâ
0,827 swie unde er wolte
0,828 aldâ er wesen solte
0,829 zuo dem lantgrâven dô
0,830 sprach der küninc Gwidô
0,831 “sît uns der markgrâve Kuonrât
0,832 helfe versaget hât
0,833 ein guot trôst uns daz is
0,834 hêrre wir haben iuch gewis”
0,835 “daz habet ganzlîche”
0,836 sprach der muotes rîche
0,837 Ludewîc . “als ich iuch sage
0,838 lât uns hier ruowen ahte tage
0,839 hêrre . sô iz in vride stât”
0,840 daz der küninc vür guot hæte
0,841 der lantgrâve aber dô
0,842 sprach zuo dem küninge sô
0,843 “âne sorge ir weset mîn .
0,844 unde aller der die mit mir sîn
0,845 her kumen . niht en beitet
0,846 zuo dem her ire rîtet
0,847 unde sehet daz sie unvuogen niht
0,848 wande iz ofte alsô geschihet
0,849 waz sô die altesten sprechen
0,850 daz die jungen iz verbrechen
0,851 als sie muotwillic sîn”
0,852 zuo dem her reit nû hin
0,853 der küninc er brâhte in mære
0,854 daz in zuo helfe wære

0,855 der lantgrâve unde wie in hât
0,856 helfe versaget hêrr Kuonrât
0,857 des lantgrâven sie wâren vrô
0,858 ûf den markgrâven sie sprâchen sô
0,859 er tete iz unbillîche
0,860 unde er hæte lasterlîche
0,861 sich gevidet mit dem von Babilô
0,862 ouch was noch ire rede sô
0,863 er hæte des gelt von im genomen
0,864 der solte im niht zuo nutze kumen
0,865 er solte sîn iemer laster hân
0,866 der rede wart dâ vile getân
0,867 dise rede under den bezzisten lief
0,868 nû wâren des lantgrâven schif
0,869 ûf dem mer als er die über brâht
0,870 hæte unde rîchelîche bedâht
0,871 mit kost unde swes man dorfte dâr zuo
0,872 die sâhen dise kumen nû
0,873 die vore Akers lâgen . dô
0,874 sprach der küninc Gwidô
0,875 “ich sihe des lantgrâven lewen
0,876 kumen . wole mûgen wir uns sîn vrôuwen”
0,877 daz volc zuo dem stade lief
0,878 ouch die verrihten die schif
0,879 die liezen gên zuo der porte die
0,880 ûz ire anker wurfen sie
0,881 als si des sîn bewîset dô
0,882 unde beitten ires hêrren kunft sô
0,883 an dem andern – tage dâr nâch
0,884 des banier man lîhte erschînen sach
0,885 als umbe mitten morgen vruo
0,886 mit der in wærlîche kumen zuo
0,887 Ludewîgen unde Herman
0,888 mit in gar die werden man
0,889 als si die brâht hetten dar
0,890 berihtet ritterlîchen gar
0,891 mit wâpenen als sie vestgemuot
0,892 wâren erwelte ritter guot
0,893 von hôher geburt die klâren
0,894 hundert ir dâ wâren
0,895 die zierte der ritterschafte reht
0,896 ouch in manic tiure edeler kneht
0,897 reit mite manlîche gar
0,898 ir aller wâpen lichtgevar
0,899 einer varwe gelîch
0,900 wâren in dâ wünniclich
0,901 ire wâpenkleit lâsûrblâe
0,902 dâr ûf der bunde lewe dâ

0,903 was gestrôuwet wole lusticlîche
0,904 al ire covertiure dem gelîch
0,905 ire helme wünniclîche
0,906 gezieret rîchelîche
0,907 wole georset sie zugen zuo
0,908 mit al den werden Gwidô nû
0,909 den hêrren was engegen kumen
0,910 sie wurden vroelîche genomen
0,911 dâ in die êrlîche bruoderschaft
0,912 zuo der gotes ritterschaft
0,913 von dem spitâle
0,914 sancte – Johannis mit manigem frâle
0,915 mit manigem tiuren ritter sie
0,916 sînes ordenes entvie
0,917 der hûchmeister unde vrô
0,918 sam tâten die tĒmpelbruoder dô
0,919 die von dem diutischen hûse dem gelîche
0,920 unde envollen lieplîche
0,921 die hetten des reht wande er in
0,922 ein sunderlich helfe ist gesîn
0,923 zuo bestætenne ire orden
0,924 sîn muot was des nie entworden
0,925 noch er wolte des verzagen
0,926 er ne wolte volle kost tragen
0,927 ouch gegen den vîanden zuo wer
0,928 manlîche ûf strîtes zer
0,929 swâ man solte nâch prîse strîten
0,930 unde hōvischlîchen rîten
0,931 ein wazzer nâhen Akers vlôz
0,932 als iz noch tuot des genôz
0,933 die stat des huote unde âne iz
0,934 sô hette si wazzers boesen niez
0,935 si muoste des lîden swære
0,936 ob si des entbære
0,937 bî daz wazzer ûf daz velt
0,938 hiez der lantgrâve die gezelt
0,939 ûf slahen rîcher koste gar
0,940 als si die brâht hetten dar
0,941 die grâven vrîen dienstman
0,942 wole wart gezieret nû der plân
0,943 vore Akers unde überlusticlîche
0,944 sie leiten zuo einem ringe sich
0,945 daz gênte volc ich sage iuch wie
0,946 buten dâ al umbe sie . die
0,947 hêrren . doch guoter wîse hin danne
0,948 ir was vile . ûf den plân
0,949 Ludewîc sîn gezelt dâ sunderlîche
0,950 hæte sîn pavelûn . ouch dem gelîch

0,951 hette sînez besunder Herman
0,952 sîn bruoder . der junge sîeze man
0,953 des hôhe prîsente tât
0,954 zuo sîezer rede brâht hât
0,955 hêrr Wolvram von Eschenbach
0,956 gegen des bruoderes gezelte über den bach
0,957 iz was ûf gezogen als daz schuof
0,958 Ludewîc der hêrre gesniten ûf
0,959 ir beider gezelt der lewe dâ
0,960 in ein gar tiur obdach blâe
0,961 ûf al der hêrren gezelten sô
0,962 lac ie des hêrren zeichen dô
0,963 in wünniclîchem werde gar
0,964 was mit den lantgrâven dar
0,965 kumen der – grâve von Gelre
0,966 bî den hæte der von Melre
0,967 ein ritter geherberget ûf dem plân
0,968 niht gar rîche doch ein êrlich man
0,969 ein Dürinc des wolte in
0,970 der grâve nâhen im sîn
0,971 durch daz er was ein hōvisch man
0,972 Albreht ein lustic kumpân
0,973 // dâ was der burcgrâve von Altenburc
0,974 – wîse zuo strîte kluoc
0,975 der heidenschaft zuo nîde
0,976 was dâ der voget von Rîde
0,977 Witege was geheizen der
0,978 der heidene tôt was sîn ger
0,979 // der grâve Albreht von Popenburc
0,980 dâ was des manic werlich Turc
0,981 in strîte unergetzet entgalt
0,982 der von im tôt wart gevalt
0,983 // dâ was der grâve von Arnstein
0,984 Walther der guote unde doch ein
0,985 manlich wolegeborener helt
0,986 sîn tât zuo prîse was gezelt
0,987 // Heinrîch von Helderunge
0,988 der starc vrece junge
0,989 die banier was bevolhen deme
0,990 die er vuorte âne alle scheme
0,991 // der sich wolte vinden in voller wer
0,992 der êrlîche grâve Gunther
0,993 von Kevernberc dâ schoene lac
0,994 nâhen im dâ ein sîn werder mâc
0,995 // von Bîchlingen der grâve Vriderîch
0,996 von Swarzburg der grâve Heinrîch
0,997 gerîchet gar aller tugende
0,998 an prîse sich wole vermügente

0,999 nâch dem sô wolte er werben ie
0,1000 // die wîle er lebete . der grâve von Wie
0,1001 Bertolt der manlîche
0,1002 lac dâ ouch werlîche
0,1003 den heidenen ein strenge lâge
0,1004 der lantgrâven mâge
0,1005 von hôhem arte die klâren
0,1006 dâ mit ire vriunden wâren
0,1007 // zuo liebe der himele majestât
0,1008 von Ohsenburc grâve Kuonrât
0,1009 der hôher tiure gernte
0,1010 was ie . sîn prîs ist wernte
0,1011 noch vester unde muoz êwic sîn
0,1012 mit im was dâ der oeheim sîn
0,1013 // Liutolt der grâve von Pleien
0,1014 als ein sûezer regen des meien
0,1015 vrôuwet daz ertrîche unde vruhtbære tuot
0,1016 alsô der milte suozgemuot
0,1017 ervrôuwete waz sô was kumberhaft
0,1018 menlîche sîne ritterschaft
0,1019 er üebete in vollem prîse
0,1020 nâch gote der werlte wîse
0,1021 sîner gelübede sîner worte wâr
0,1022 den vîanden ein strenger var
0,1023 sîne tæte sîn niht beliben
0,1024 noch sîne tugende ungeschriben
0,1025 swie er vuor in werdicheit
0,1026 swaz er prîses ie erstreit
0,1027 dâ ist ein buoch von gemachet
0,1028 unde zuo nützer rede brâht
0,1029 swie er gap mit vollem âmen
0,1030 nû haben wir sînes sâmen
0,1031 der aneherre er ist gesîn
0,1032 die tugentlîche grævinne
0,1033 hier zuo lande Maria sie
0,1034 ist genant ire bruoder die
0,1035 manlîchen . ire geburt die klâren
0,1036 von Pleien die hêrren wâren
0,1037 grâve Otto unde grâve Kuonrât
0,1038 die mit prîse bernter tât
0,1039 hier hôhen ruom erwurben
0,1040 strîtlîcher nôt sie sturben
0,1041 doch mit sûrem widergelde
0,1042 mit in ûf kurzem velde
0,1043 al der zal von harter strîtes nôt
0,1044 zelte man sehs hundert ligen tôt
0,1045 niht verre von der stat zuo Lâ
0,1046 sie stalten grôzen mein ouch dâ

0,1047 an den Ungern die sie
0,1048 sluogen tôt alsô daz viehe
0,1049 unmâzen vile beleip der dâ
0,1050 tôt . dise edele Maria
0,1051 hæte einen wirt der ouch rîche
0,1052 was êren . envollen manlich
0,1053 von dem Niuwenhûse sô hiez der
0,1054 geboren von hôhen grâven hêr
0,1055 von Düringen Mîsne Swâben
0,1056 êrlîche gelebet sie haben
0,1057 eteslîche ir nû hier lâgen bî
0,1058 dem lantgrâven di
0,1059 wole wâgen torsten manlîche gemuot
0,1060 durch got ire leben ouch ire guot
0,1061 dirre Uolrîch uns nâch im liez
0,1062 einen sun der ouch hiez
0,1063 von dem Niuwenhûse der hêrre Uolrîch
0,1064 wole mac vûre wâr daz sprechen ich
0,1065 als ich in ganz habe erkant
0,1066 alle güete ich an im vant
0,1067 nâch der wâren liebe – – gebote
0,1068 hitzige liebe er zuo gote
0,1069 hæte von aller sîner maht
0,1070 zuo allen liuten wole bedâht
0,1071 im selben als der mennische sol
0,1072 sîn geordenet ouch den andern wole
0,1073 aller güete was er guot
0,1074 dâ bî doch gar manlîche gemuot
0,1075 der arme unde der rîche
0,1076 wâren im gelîche
0,1077 einer liebe liep hæte er sie
0,1078 in grôzer diemuot êrte er die
0,1079 armen . willic gar gemuot
0,1080 unde teilte in sîn verlihen guot
0,1081 nâch der lêre gebote
0,1082 daz er zuo lêhene hæte von gote
0,1083 den habenten ouch was er des bereit
0,1084 in gote nâch sîner werdicheit
0,1085 ein vroelich wirt den gesten gar
0,1086 sîn hov selten der entbar
0,1087 ein volkomen wirt ouch guot
0,1088 sînem gesinde unde wole gemuot
0,1089 ich sage iuch niht niur wâr
0,1090 als ich in hân erkündet gar
0,1091 hier mite legen wir daz nider
0,1092 unde grîfen an daz êrste wider
0,1093 // sô daz ich kürze dirre rede werc
0,1094 dâ lac der von Kirchberc

0,1095 der gar vestgemuoten ein
0,1096 // der biderbe Hartman von Blankenstein
0,1097 der was dâ in grôzer wirde
0,1098 in strîtlicher giredede
0,1099 hier mite ich die rede kürzen wile
0,1100 noch hôher grâven vrîen vile
0,1101 herte ritter biderbe knehte
0,1102 von edelem geslehte
0,1103 swenne sô die verbunden
0,1104 die wole ire stat verstuonten
0,1105 in strîtes geverte
0,1106 manlicher tæte herte
0,1107 als er ie hôher koste pflac
0,1108 der lantgrâve schône lac
0,1109 unde ouch die mit im dâ wâren
0,1110 in rîchen gebæren
0,1111 dâ was der grâve noch der vrîe man
0,1112 niht âne sînen kappellân
0,1113 die gote tagelîche
0,1114 dâ dienen vlîzicliche
0,1115 von al ires herzen maht
0,1116 daz ambahte in sûezer andâht
0,1117 die priester zuo êren dâ tâten
0,1118 gote . unde des bâten
0,1119 in voller andâht reine
0,1120 die werden gemeine
0,1121 âne gotes liebe die ritterschaft
0,1122 hæte hier decheiner wirde kraft
0,1123 swie mac guot ritter er gesîn
0,1124 der niht liebet noch en suochet in
0,1125 den hêrren der im die ritterschaft
0,1126 an geordenet hât – dâ bî die kraft
0,1127 daz er sîn guot unde sîn leben
0,1128 mac in der vîande hende geben
0,1129 ouch in des mac benemen wole
0,1130 iz wollen die reht daz in sol
0,1131 gevorht der mennische êren
0,1132 wile er hier sîn sâlde mêren
0,1133 ouch mit im êwicliche
0,1134 sîn leben in himelrîche
0,1135 die tiuren Düringe
0,1136 alumbe zuo einem ringe
0,1137 si hetten schône sich geleit
0,1138 âne hôchwart in voller manheit
0,1139 sie wâren âne grôzen braht
0,1140 die êrsten huote dâ der naht
0,1141 der grâve hielt von Gelre dô
0,1142 die wart im geboten sô

0,1143 die naht hæte ende des morgenes vruo
0,1144 als si des wâren zuo râte nû
0,1145 die Diutischen wurden gemeinliche
0,1146 bî den hêrren sie leiten sich
0,1147 ouch waz der tÊmpelherren was
0,1148 waz der in strîte vore genas
0,1149 // der hôchmeister von sancte Johanne
0,1150 mit manigem werden manne
0,1151 sînes ordenes ouch manigen werden man
0,1152 dem er solt hæte getân
0,1153 // die von dem diutischen hûse nâhen
0,1154 dem wazzer leiten sich ouch dâ
0,1155 mit werlicher ritterschaft
0,1156 ire bruoder als si der hetten kraft
0,1157 // herzoge Bertolt von Meran
0,1158 zuo dem lantgrâven ûf den plân
0,1159 sich leite mit eineme vrenchen her
0,1160 manliche gemuot unde wole zuo wer
0,1161 // dâr nâch dar brâhte manigen man
0,1162 der markgrâve Herman
0,1163 von Baden die den heidenen haz
0,1164 truogen . nâch dem an daz
0,1165 wazzer mit einer êrlîchen rote
0,1166 als er di vuorte zuo dieneste gote
0,1167 zuo strîte wole bereite
0,1168 der bischov sich leite
0,1169 von Wirzeburc der hêrre Gotevrit
0,1170 im lâgen die Ôsterfranken mit
0,1171 // mit den sînen dem nâh
0,1172 der bischov von – Lûdeke dâ
0,1173 Ruodolv sich leite ein sælic man
0,1174 sînes lebenes er was . nâch dem sân
0,1175 leitte ein her wole ritterlich
0,1176 von Basele der bischov Heinrîch
0,1177 // von Regensburc der bischov Kuonrât
0,1178 dâ ein êrlîche rote er hât
0,1179 bischov Albreht von Bazzouwe
0,1180 dar brâhte in werdem schouwe
0,1181 ritter knehte werliche gar
0,1182 ein kleine rîche berihte schar
0,1183 // von Mîsne bischov Martin
0,1184 dâ herbergete neben in
0,1185 mit im eine genendige rote
0,1186 als si dâ wolten wesen gote
0,1187 zuo dieneste gegen der heidenschaft
0,1188 dar brâhte ouch guote ritterschaft
0,1189 // von Ohsenbrügge der bischov
0,1190 gesindes einen werden hov

0,1191 // von Abenberc grâve Vriderîch
0,1192 dar brâhte envollen manlich
0,1193 ire rehten vîande der Sarrazîne
0,1194 grâve Vriderîch von Belgerîn
0,1195 dar brâhte ein – êrlîchez her
0,1196 rîche gezieret wole zuo wer
0,1197 // von Dornburc grâve Kuonrât
0,1198 als er ein manlich herze hât
0,1199 selbe den vîanden harte gemuot
0,1200 alsô erwelte ritter guot
0,1201 ouch knehte ein werlîche schar
0,1202 brâhte der hêrre mit im dar
0,1203 // daz selbe sîn bruoder Vriderîch
0,1204 brâhte eine rote wünnlich
0,1205 dem bruoder leite er sich bî
0,1206 zageheit was sîn herze vrî
0,1207 // dar sich ouch legerte ûf den sant
0,1208 grâve Florentius von Hollant
0,1209 sîn bruoder Otto bî in
0,1210 von Bintheim als ich es bewîset bin
0,1211 sie selbe vestgemuote
0,1212 erwelte ritter guote
0,1213 si brâhten an den rivier dar
0,1214 eine kreftige schar
0,1215 gezieret wünnelîche
0,1216 die gebuoder envollen rîche
0,1217 sie wâren des guotes
0,1218 alsô wâren sie ouch des muotes
0,1219 niht sich die liezen
0,1220 rîcher koste verdriezen
0,1221 swâ si die tragen solten
0,1222 // ouch ire prîs dâ hôhen wolten
0,1223 zwêne gebuoder die ouch dâ wâren
0,1224 von hôhem arte die klâren
0,1225 an der geunêrten heidenschaft
0,1226 si hetten die guote ritterschaft
0,1227 si selbe valten manigen Turc
0,1228 die burcgrâven von Megedeburc
0,1229 unde meine den edelen Burchart
0,1230 unde sînen bruoder Gebehart
0,1231 jâ haben die werden noch daz wort
0,1232 unde iz ist wîten gar gehôrt
0,1233 swie sie als gezogene – meide gar
0,1234 wâren – al ire site klâr
0,1235 hōvischer – gebâre ire herzen guot
0,1236 dâ bî doch manlîche gar gemuot
0,1237 ires lebenes reine
0,1238 den liuten doch gemeine

0,1239 an helpe mit ire guote
0,1240 in sus wesentem muote
0,1241 sie wolten lân stæte vinden sich
0,1242 vrô . ire lebenes gotelich
0,1243 si wâren unde ire wîse sleht
0,1244 an al irem tuonde reht
0,1245 // sich legerte dar ûf daz velt
0,1246 der grâve von Mannesvelt
0,1247 mit den sînen ritterlîche
0,1248 in hôhem werde rîche
0,1249 vuor er aller tæte sîn
0,1250 den biderben grâven hiez man in
0,1251 ein rîchez umbeleger hât
0,1252 unde kreftic gar Akers die stat
0,1253 in driu geteilet lâgen die her
0,1254 mit kraft werte in daz mer
0,1255 der eine teil unde manlîche
0,1256 diz was der stat gar schadelich
0,1257 wan solte swaz spîse kumen in
0,1258 daz muoste von dem mer sîn
0,1259 swie sô vore Akers nû al die velt
0,1260 truogen rîchheit bernten gelt
0,1261 an den werden unde voller zierde dô
0,1262 ich wæne ire zierde selten vrô
0,1263 der stat volc die machete
0,1264 unde selten sie belachete
0,1265 noch wole si in behagete
0,1266 den vride widersagete
0,1267 die gotes êrlîche ritterschaft
0,1268 dem soldâne unde sîner kraft
0,1269 Ludewîc der wert genante
0,1270 der lantgrâve von Düringen lande
0,1271 in hôhem werde vuor sîn prîs
0,1272 wole vorebedâht unde wîs
0,1273 er was zuo solichen dingen kluoc
0,1274 die koste der hêrre selbe truoc
0,1275 al ire malwerc die stat
0,1276 Akers an dem wazzer hât
0,1277 gar benam er in den nutz
0,1278 er wîste hin danne den wazzers schutz
0,1279 von ire mûlen in wîten graben
0,1280 si mohten des keinen nutz nû haben
0,1281 in zuo vrumen er erdâhte
0,1282 als er die zuo brâhte
0,1283 mûlen almitten in dem her
0,1284 an daz wazzer doch niht von grôzer zer
0,1285 noch von grôzer koste sô wâren die
0,1286 doch grôzen nutz ir hetten sie

0,1287 ire market von Ludewîges her
0,1288 hæte sîn groeze biz an daz mer
0,1289 ouch an der sît der stat
0,1290 Gwidô der küninc den sînen hât
0,1291 den sînen ouch hæte daz dritte her
0,1292 daz zwischen der stat lac . unde dem mer
0,1293 unde iz werte der stat
0,1294 noch gâben in die merkte vollen rât
0,1295 nû besande sich ouch Salatîn
0,1296 swâ sô wâren die Sarrazîne
0,1297 zuo den er vriuntschaft sich vore sach
0,1298 umbe helfe er die sprach
0,1299 an sînen brieven er in klagete
0,1300 ouch mit den boten swie im entsaget
0,1301 hetten die kristene unde swie
0,1302 mit kraft vore Akers lægen sie
0,1303 ûf schaden der kristenheit
0,1304 im quâmen wole bereit
0,1305 vile küninge der heidene vürsten
0,1306 in manlîchen getürsten
0,1307 mit in erwelte ritterschaft
0,1308 Salatîn mit grôzer kraft
0,1309 mit manigem stolzen Sarrazîne
0,1310 als die ûf prîses gewin
0,1311 wâren rîche gezieret gar
0,1312 kumen in sîn helfe dar
0,1313 küninge vürsten grâven vrîen
0,1314 werde ritter als – ire amîen
0,1315 sie nâch minnegeltes lône
0,1316 hetten ûz berihtet schône
0,1317 kostelich nâch rîchheit wirde
0,1318 ire helme ire zimierde
0,1319 ire schilde rîche gezieret
0,1320 manigen enden dâr ûf verwieret
0,1321 in lîhtez golt manic tiur stein
0,1322 der von ire helmen ire schilden erschein
0,1323 durchliuhtic unde heiter var
0,1324 in hôher wirde schouwe gar
0,1325 alsô sie wâren hôchgemuot
0,1326 der Sarrazîne grôz übervluot
0,1327 als si ouch manlich wâren
0,1328 in hôchverte gebâren
0,1329 in wünnevarwen schîne
0,1330 si volgeten Salatîne
0,1331 dem soldâne von Babilô
0,1332 vore Akers die werden kristene dô
0,1333 sie umberingeten vore der stat
0,1334 ie wider einen kristen hât

0,1335 dar brâht zuo velde Salatîn
0,1336 hundert zuo wer der Sarrazîne
0,1337 in driu geteilet die ouch lâgen
0,1338 grôzer hôchwart sie pflâgen
0,1339 zuo guoter mâze verre geleit
0,1340 sie hetten sich von der kristenheit
0,1341 sie hetten in rîchem schouwe
0,1342 die velt tal unde ouwe
0,1343 mit gezelten tiuren wîte bedakt
0,1344 vile banier hôhe den obe gestakt
0,1345 dirre Venus die gotinne
0,1346 hæte gesniten in die sîn
0,1347 kostebære unde rîche genuoc
0,1348 der ander zuo der er liebe truoc
0,1349 ein wünnic vrouwenbiled
0,1350 der zeichene wâren ouch ire schilde
0,1351 dirre Martem des strîtes got
0,1352 als in ire unsin daz gebôt
0,1353 jener Iovem der ander Jupitern
0,1354 als di sie helfe solten wern
0,1355 daz ich die rede kürze hier mite
0,1356 ire baniere vile von spæhem snite
0,1357 als si in der hetten erdâht
0,1358 wâren dâ zuo liechte brâht
0,1359 ouch nâch den tieren wilde
0,1360 ouch den vogeln ûf dem gevilde
0,1361 Salatînes banier dâ hæte
0,1362 iren got Machmet
0,1363 als er daz ouch wolte
0,1364 des biled von golde
0,1365 rîche unde kostelîchen genuoc
0,1366 ein karrosche hôhe enbore iz truoc
0,1367 ûf einen boum versmidet vaste
0,1368 ouch nider wart des boumes last
0,1369 ûf den karroschen versmidet
0,1370 mit îsene starc dâ zuo gewît
0,1371 ire got Machmet der helfe in
0,1372 Christus sol sîner Kristen sîn
0,1373 ein wâre helfe in ire nôt
0,1374 sie wâren dâ durch sîn gebot
0,1375 grôz was der Sarrazîne maht
0,1376 von vile busûnen lûten braht
0,1377 dâ was . tambûr ire rotumbel
0,1378 wurden ûf geslagen . ire dônes hel
0,1379 erschalten dâ manic heidenisch horn
0,1380 die edelen kristene wolegeboren
0,1381 als daz was des bezzisten rât
0,1382 mit sturme suochten sie di stat

0,1383 tegelîche mit starkem her
0,1384 die innern wâren ouch wole zuo wer
0,1385 gegen den sturmes herten
0,1386 die stat sie manlîche werten
0,1387 dort inne ouch hier ûze nôt
0,1388 sie lîten beidersît ir tôt
0,1389 beleip dâ der werlîchen vile
0,1390 iz geschach als ich iuch sagen wile
0,1391 swenne an die stat die kristene
0,1392 stürmeten unde als daz wisten
0,1393 unde ervuoren die Sarrazîne
0,1394 als in gebôt daz Salatîn
0,1395 mit kraft quâmen sie bereit
0,1396 jagente ûf die kristenheit
0,1397 die vore der stat arbeiten sich
0,1398 hinderwart unde snellîche
0,1399 sie tâten grôzen schaden in
0,1400 mit geschozze unde kârten wider hin
0,1401 dâ mit her lac Salatîn
0,1402 alsô vile der kristenen sîn
0,1403 verderbet in der stürmenten schar
0,1404 tegelîche die heidene suochten dâr
0,1405 daz stürmen muosten sie nû lân
0,1406 ein ander werc zuo handen vâhen
0,1407 als daz stürmen was gelegen
0,1408 unde sie hetten des verpflegen
0,1409 nû wolten die heidene ouch stille sîn
0,1410 niur bî vieren oder bî drîn
0,1411 die warte manlîche besuochte die
0,1412 ûf einem rügge der schiet sie
0,1413 eines berges der was niht hôch
0,1414 doch er mit hoeche über zôch
0,1415 der kristene unde der heidene her
0,1416 von dem gebirge biz an daz mer
0,1417 den heidenen ouch gelîch die huote
0,1418 suochten in vollem muote
0,1419 die werden Düringe
0,1420 ich meine die Düringe
0,1421 âne daz iz niht ergienge
0,1422 die wartliute einander sich suochten sie
0,1423 mit tjoste die manlîche wart gevrumet
0,1424 ire starken sper entzwei gedrumet
0,1425 von ire ellenen sô die tjoste geschach
0,1426 daz man wole der spere krach
0,1427 hôrte in den heren beiden
0,1428 der kristene unde der heidene
0,1429 die kristene zuo gote wîs
0,1430 die heidene durch der werlte prîs

0,1431 ûf der warte manige zît
0,1432 manigen werlîchen strît
0,1433 sie hetten des niemer tac gebrach
0,1434 den heidenen dâ doch wê geschach
0,1435 von den kristenen die sie dâ valten
0,1436 unde sie gote behalten
0,1437 wolten daz lop mit wirde kraft
0,1438 an der Salatînes ritterschaft
0,1439 die von den Düringen ûf der warte
0,1440 wurden geletzet harte
0,1441 gefangen verwunt eteslîch erslagen
0,1442 die wolte mit tjoste ein heiden klagen
0,1443 gezieret nâch grôzer werdicheit
0,1444 manlîche er ûf die warte reit
0,1445 der heiden was ein hôher frâl
0,1446 manic werder amiral
0,1447 was im zuo dieneste mit im dar
0,1448 kumen manlîchen gar
0,1449 die hiez er mit gemache sîn
0,1450 aleine reit der Sarrazîn
0,1451 als er gerte der tjoste
0,1452 der grâve wole torste tragen koste
0,1453 daz man an sînem geverte sach
0,1454 sîner wâpene obedach
0,1455 was ein samît tiuwer von Suntîn brâht
0,1456 gezieret nâch wirdiclîcher ahte
0,1457 mit goltborten reine
0,1458 dâr ûf gewieret gesteine
0,1459 durchsihtic tiuwer liehtgevar
0,1460 dâr abe sie erglasten klâr
0,1461 sô daz man sich in in besach
0,1462 des selben truoc sîn ors ein dach
0,1463 daz was kreftic unde starc
0,1464 sîn schilt ouch liechten schîn niht barc
0,1465 dâr ûf ein vrouwenbiledede lac
0,1466 nâch der die sîn mit liebe pflac
0,1467 sîn helm gezieret reine
0,1468 mit manigem liechten steine
0,1469 sîn zimier dâr obe rîche
0,1470 ez vuorte der manlîche
0,1471 in sîner hant von rôr ein sper
0,1472 starc . zuo brâht nâch sîner ger
0,1473 vore bî dem îsene ein kleiner vane
0,1474 nâch dem schilde daz biledede dâr ane
0,1475 gezieret wünneclîche
0,1476 nâch dem unde er was rîche
0,1477 sô reit in wirde dô der frâl
0,1478 in markte ein hêrre der sich des hal

0,1479 daz er dem heidene begegenen wolte
0,1480 von Pleien der grâve Liutolt
0,1481 heimelîche er sich berihte zuo
0,1482 sîn ors was im ouch kumen nû
0,1483 snel unde starc sô was daz
0,1484 in Kristes namen dâr ûf er saz
0,1485 er gâhete dâ er den heiden sach
0,1486 daz her gemeine im warte nâch
0,1487 sîner kunft der heiden werde
0,1488 als ein helt er der begerte
0,1489 Liutolt ouch als ein man erwegen
0,1490 dem heidene stapfete engegen
0,1491 ich sage als ich ez habe vernomen
0,1492 dô sie einander wâren kumen
0,1493 sô nâhen unde si des dûhte zît
0,1494 als man zuo der tjoste ersprengenes pffît
0,1495 die grâven beide wolgeboren
0,1496 die ors sie nâmen ûf die sporen
0,1497 mit kraft sie die ersprangten
0,1498 ire sper zuo rehte sie sankten
0,1499 ietweder gewinnes sich versach
0,1500 Liutolt sîn sper dâ brach
0,1501 ûf dem tiuren Sarrazîne
0,1502 der manlîche ouch daz sîne
0,1503 vertet als er des gerte
0,1504 sie besâzen beide . zuo dem swerte
0,1505 greif der heiden manlîche
0,1506 grâve Liutolt muoste wern sich
0,1507 der ouch manlîchen nû
0,1508 starke gap dem heidene zuo
0,1509 der ûf in slege ungezalt
0,1510 sluoc . die im gar sûre galt
0,1511 Liutolt . des krîe was dâ sô
0,1512 “Pleien .” ouch ofte “Babilô”
0,1513 der heiden manlîchen rief
0,1514 unde doch mit maniger wunden tief
0,1515 als er ein manlich herze truoc
0,1516 den sige Liutolt im abe sluoc
0,1517 mit grôzer nôt im daz geschach
0,1518 daz im dâ sicherheit verjach
0,1519 der manlîche Sarrazîn
0,1520 ungerne wolte er toeten in
0,1521 Liutolt durch sîne manheit
0,1522 gevangen der heiden mit im reit
0,1523 in daz her des wâren vrô
0,1524 die kristene . der grâve Liutolt dô
0,1525 sînem gaste schuof gemach
0,1526 den wuntsegen man im sprach

0,1527 ein arzât gewan er ime
0,1528 niht von mir selben ich iz nime
0,1529 sunder als ich ez vernomen hân
0,1530 bin des von Düringen Herman
0,1531 der lantgrâve was ouch geriten
0,1532 ûf die warte unde hæte gestriten
0,1533 mit einem werden Sarrazîne
0,1534 den brâhte ouch er gevangen in
0,1535 daz her . als er nâch prise ranc
0,1536 des sageten im gar die werden danc
0,1537 diz erzurnte Salatînen
0,1538 unde gar die Sarrazînen
0,1539 swaz sô ringe geriten was
0,1540 mit bogen snel ûz er die las
0,1541 gesundert von der vürsten her
0,1542 tûsent die wâren unde noch mêt
0,1543 als er daz hæte geheizen sie
0,1544 alle tage ranten die
0,1545 vore der kristene her sneller vart
0,1546 ûz ire starken bogen hart
0,1547 manigen pfil sie sanden in
0,1548 unde jageten wider vlühtic hin
0,1549 diz was unlidebære
0,1550 – – dem volke unde swære
0,1551 unde almeistic den die giengen
0,1552 sie wâren die mêt entviengen
0,1553 an ire legere die geschozze
0,1554 daz gemeine volc ouch des verdrôz
0,1555 durch gebrechen manigen den sie liden
0,1556 unde die vürsten niht en striten
0,1557 den sie alsô sageten swie
0,1558 niht alsô dâ ligen sie
0,1559 wolten strîten unde daz niht sparn
0,1560 oder wider zuo lande varn
0,1561 umbe sus sie liden nôt
0,1562 sie wæren kumen dar durch got
0,1563 durch den sie wolten wâgen sich
0,1564 wære iz niht wole behegelic
0,1565 den bezzisten als die dâ wæren doch
0,1566 waz des si wolten dannoch
0,1567 entweder strîten oder varn
0,1568 unde daz niht langer sparn
0,1569 die bezzisten rieten in dâ . swie
0,1570 âne sie niht solten strîten . sie
0,1571 hetten es ouch iemer schande
0,1572 zogeten sie wider zuo lande
0,1573 ouch striten sie unde verluren
0,1574 den sige . des sie grôz laster kuren

0,1575 des muoste schaden unde leit
0,1576 lîden die kristenheit
0,1577 // nâch gemeiner rede dô
0,1578 was ire antwürte alsô
0,1579 “uns ist eine ein êrlîcher tôt
0,1580 nützer danne daz wir lîden nôt
0,1581 unde an dem lîbe alsô verwesen
0,1582 wer mohte der noete lange genesen
0,1583 swaz sô uns nû dâ geschihet
0,1584 wir en vlihen vürnamens von strîte niht
0,1585 noch wir wollen des verzagen
0,1586 ob wir dâ werden gar erslagen
0,1587 êrlîche an der marter nôt
0,1588 den sige beheltet uns der tôt
0,1589 ob wir in in gotes êre erholen
0,1590 wir wollen in williclîchen dolen”
0,1591 veste sie wâren des willen
0,1592 dô sie des niht mohten gestillen
0,1593 die rede hielten wider si
0,1594 an den küninc daz brâhten di
0,1595 der besande die spitâlære
0,1596 unde ouch die tÉmpelære
0,1597 die bezzisten als er die hâte
0,1598 unde wart mit den zuo râte
0,1599 waz man tuon mohte
0,1600 unde im zuo welenne tohte
0,1601 nû wart der rât ûf gezoget
0,1602 unde gesazt an der Düringe voget
0,1603 der riet manlîche dâr zuo
0,1604 er sprach “sô daz volc nû
0,1605 zuo strîte ganzen willen hât
0,1606 sô ist ouch ganzer daz mîn rât
0,1607 daz wir ouch manlîche grîfen zuo
0,1608 unde uns ûf strît berihten nû
0,1609 in dem namen der hôhen trinitât
0,1610 unde in des êre der uns hier hât
0,1611 zuosamene brâht nû lât daz sîn
0,1612 ist sterker uns hêrr Salatîn
0,1613 unde ist der sînen vore uns mêt
0,1614 sô ist daz doch geschehen êr
0,1615 daz ein kleinez her mit kraft
0,1616 mit gotes helfe sigehaft
0,1617 wart . an der tobenden heidenschaft
0,1618 unde an ire grôzen ritterschaft
0,1619 Gîdeôn ûf lîbes zer
0,1620 driu hundert er brâhte zuo wer
0,1621 gegen vile tûsenden den doch er
0,1622 an gesigete nâch sîner ger

0,1623 unde sluoc tât almeistic die
0,1624 daz mac ouch got uns geben hier
0,1625 der uns vürenamens niht en lât”
0,1626 in geviel wole des hêrren rât
0,1627 mit Salatîne der gegen in lac
0,1628 sie nâmen in einen strîtes tac
0,1629 der bereit des wolte sîn
0,1630 ûf den tac was vride – zwischen in
0,1631 die kristene des kûme erbeitten
0,1632 ûf strît sie sich bereitten
0,1633 ouch was diz des lantgrâven rât
0,1634 man solte lâzen vore der stat
0,1635 liute die ane væhten die
0,1636 unde tagelîchen mûejeten sie
0,1637 dâ wart geschicket zuo daz her
0,1638 daz dâ lac an dem mer
0,1639 unde noch als ich iuch sagen wile
0,1640 des volkes zuo vuoze was dâ vile
0,1641 daz truoc dâ maniger hande wer
0,1642 sie wurden geteilet iegelîchem her
0,1643 gar ebene unde ordenlîche
0,1644 als man sprichet gar gelîche
0,1645 in was daz alsô mite getân
0,1646 vore den rîtenten sie solten gân
0,1647 swenne sô des quæme die zît
0,1648 sie solten heben êrst den strît
0,1649 des wâren die vuoze gengel vrô
0,1650 dâr ûf berihten sie sich dô
0,1651 zuo dem küninge die Franzoisære
0,1652 unde gar die Lampartære
0,1653 als sie dâ wâren gemeinlich
0,1654 sie hielten unde schicketen sich
0,1655 ir was vile iz wolte sô
0,1656 wole . der küninc Gwidô
0,1657 sô hielten zuo dem lantgrâven sich
0,1658 die diutischen vrô unde williclich
0,1659 der hôhe meister von sancte Johanne
0,1660 mit manigem begebenen manne
0,1661 als er die hæte mit ime dô
0,1662 der meister von dem templô
0,1663 mit sînen bruodern vroelich
0,1664 under sîn banier ouch schicketen sich
0,1665 die bruoder als die des gerten
0,1666 von dem diutischen hûse . der werden
0,1667 vrôuwete der edele vürste sich
0,1668 von Helderungen Heindrîch
0,1669 der was ein starc manlîcher man
0,1670 den geviel die banier an

0,1671 die er vüeren solte
0,1672 als der lantgrâve daz wolte
0,1673 die Heinrîch ritterlîche
0,1674 vuorte unde manlîche
0,1675 ûf hôhes prîses bejac
0,1676 in was nû kumen strîtes tac
0,1677 iz was noch des tages vruo
0,1678 der banier was geschicket zuo
0,1679 als er selbe des begerte
0,1680 von Gelre der werde
0,1681 als im ie liebte werdicheit
0,1682 der von Altenburc mit im dâ reit
0,1683 des kunft beklagete dâ manic Turc
0,1684 dâ reit grâve Albreht von Popenburc
0,1685 von Riede Witege der voget
0,1686 noch der banier bî zogete
0,1687 von Arnstein hêrr Walther
0,1688 unde anderre werden grâven mêr
0,1689 ouch der lantgrâve Herman
0,1690 vile vrîen êrlîche dienstman
0,1691 ûf strît vreche gar gemuot
0,1692 die banier veste was behuot
0,1693 von manigem rittere wolegeboren
0,1694 Ludewîc hielt die spitze vorne
0,1695 ouch die strîtherten leien
0,1696 der von Moseburc unde der von Pleien
0,1697 grâve Liutolt unde grâve Kuonrât
0,1698 sie wâren von ritterlîcher tât
0,1699 als si ez bewîsten an dem tage
0,1700 ir quam manic Sarrazîn zuo klage
0,1701 Vriderîch von Bîchlingen
0,1702 der edele von Lîningen
0,1703 grâve Vriderîch sô hiez ouch der
0,1704 ein manlich hêrr gar was er
0,1705 veste gemuot ûf strîtes werc
0,1706 der wolegeborene von Hennenberc
0,1707 grâve Poppe er reit ouch dâ
0,1708 zuo dem hæte sich gedrenget nâhe
0,1709 grâve Kuonrât sîn bruoder Vriderîch
0,1710 von Dornburc gezieret ritterlîche
0,1711 sie wâren kumen unde gar
0,1712 erwegenes muotes dar
0,1713 von Meideburc grâve Burchart
0,1714 unde sîn bruoder Gebehart
0,1715 von Kevernberc grâve Gunther .
0,1716 dâ reit ouch ûf der vîande zer
0,1717 ein werder grâve manlich
0,1718 von Abentberc hêrr Vriderîch

0,1719 ouch grâve Vriderîch von Bergelîn
0,1720 bî dem lantgrâven gewesen sîn
0,1721 hêrren von vrîer willeküre
0,1722 als sie des tages mit im vore
0,1723 der banier wolten strîten
0,1724 noch sach man dâ bî im rîten
0,1725 manigen werden ritter guot
0,1726 ûf strît vesten gar gemuot
0,1727 vore der baniere . si truogen haz
0,1728 der heidene diete als si in daz
0,1729 des tages dâ bewîsten
0,1730 an in sich hôhe prîsten
0,1731 der lantgrâve im liebe sach an in
0,1732 vrô wolte er der werden sîn
0,1733 als er wole mohte . wan alle die
0,1734 er bî im dâ sach . erwelte sie
0,1735 ritter wâren veste gar
0,1736 ûf strît manlîche berihtet dar
0,1737 noch wâren dâ der werden vile
0,1738 die ich mit namen niht setzen wile
0,1739 daz ich die rede kürze sô
0,1740 hinden nâch der banier dô
0,1741 als sie zuo strîte wâren wîs
0,1742 der wolegemuote markîs
0,1743 von Paden der hêrre Herman
0,1744 er hæte dâ manigen werden man
0,1745 dâ reit mit werlîcher hant
0,1746 Florentius von Hollant
0,1747 sîn bruoder Otto von Bintheim
0,1748 der grâve Huc von Wertheim
0,1749 von Meran herzoge Bertolt
0,1750 der dâ hôhen prîs erholete
0,1751 an den vîanden die er valte
0,1752 grâve Bertolt von Rabenswalde
0,1753 mit den sînen er ouch dâ reit
0,1754 gar in grôzer werdicheit
0,1755 in heldes gebâren
0,1756 die von Swarzburg dâ wâren
0,1757 mit einer êrlîchen rote
0,1758 als si dâ wolten dienen gote
0,1759 grâve Gunther unde Heinrîch
0,1760 sînes wesenes dâ niht schamete sich
0,1761 von Blankenberc der grâve wert
0,1762 als er der heidene schaden gerte
0,1763 sô was er vestgemuoter gar
0,1764 ein wærlîch helfe der schar
0,1765 swaz sô hêrren . rittere . manne
0,1766 gar die bischove mohten hân

0,1767 die wâren als ich iuch sage nû
0,1768 geordenet disen hêrren zuo
0,1769 ouch von dem spitâle der hôchmeister
0,1770 den Sarrazînen leiste er
0,1771 des tages waz er in vore gehiez
0,1772 doch was dâ kleine ire geniez
0,1773 die tÊmpeleise wâren ouch dâ
0,1774 den hetten sich zuo geschicket nâhe
0,1775 von dem diutischen hûse die hêrren
0,1776 ûf ein êwigez werren
0,1777 daz sie mit werlîcher kraft
0,1778 vrumeten dâ der heidenschaft
0,1779 ich meine der bittern helle sêr
0,1780 in al des lantgrâven her
0,1781 sô wart dâ vunden nie dechein man
0,1782 er ne hæte iz dâ gerne baz getân
0,1783 der küninc unde die franzoise
0,1784 unde eteslîche der Burgundoise
0,1785 vile was dâ der Lamparten
0,1786 die ûf den küninc gewarten
0,1787 ein kreftic her vuorte dô
0,1788 ûf strît küninc Gwidô
0,1789 ouch wole ordenlîche geschart
0,1790 sîn banier ritterlîche bewart
0,1791 sie stapfeten siticlîche
0,1792 gegen den vîanden . doch manlîche
0,1793 sie sâhen in rîchem schîne
0,1794 ouch gegen in die Sarrazîne
0,1795 kumen als in niht wære gâch
0,1796 waz von Terramêre sprach
0,1797 hêrr Wolvram swie wünniclîche
0,1798 swie er gezieret rîche
0,1799 gegen Willhalme über mer
0,1800 brâhte ein werlîchez her
0,1801 alsô brâhte in grôzer wirde
0,1802 under kostelîcher zierde
0,1803 gegen den kristenen hier Salatîn
0,1804 manigen manlîchen Sarrazîn
0,1805 zuo schaden unde zuo leide
0,1806 swaz walt anger heide
0,1807 die geblüemeten velt licht ouwe
0,1808 vore brâhten zuo wünnenschouwe
0,1809 varwe zuo werdem schîne gar
0,1810 vürebaz quâmen sie geflôriert dar
0,1811 nâch rîcher koste milte
0,1812 ûf helmen unde ûf schilde
0,1813 ire covertiure ire wâfenkleit
0,1814 nâch volkomener rîchheit

0,1815 sie quâmen dare alle werdicliche
0,1816 in zwô schar sie hetten sich
0,1817 geteilet daz wolte Salatîn
0,1818 zuo strîte gegen künige Gwiden . sîn
0,1819 er hæte ein kreftigez her
0,1820 doch die ander schar hæte volkes mêr
0,1821 als der soldân daz wolte
0,1822 die mit den diutischen strîten solte
0,1823 houbetman was der selben schar
0,1824 ein vürste vestgemuoter gar
0,1825 er was Salatînes mâc
0,1826 er torste ûf prîses bejac
0,1827 swâ man solte strîten
0,1828 wole hurticlichen rîten
0,1829 er selbe ritterlichen gezieret
0,1830 als was ouch geflôrieret
0,1831 garliche sîn her
0,1832 wole berihtet zuo wer
0,1833 als er ouch milticlichen gap
0,1834 Suntin unde Hallap
0,1835 noch vile bürge lant unde rîche stete
0,1836 der hêrre ime zuo dieneste hæte
0,1837 geheizen was er Lêvi
0,1838 im riten noch ander vürsten bî
0,1839 der ich iuch niht genennen kan
0,1840 wole mohten sorge ûf sie hân
0,1841 die in dâ quâmen engegen
0,1842 unde mit in strîtes solten pflegen
0,1843 die doch vrô gedingen
0,1844 hetten ûf guot gelingen
0,1845 sô man ez iuch ganz sagen muoz
0,1846 swaz des volkes zuo vuoze
0,1847 doch manlich unde werhaft
0,1848 was dem lantgrâven zuo geschaffet
0,1849 daz schickete er bî sîte
0,1850 ûz an die wîte
0,1851 als im daz sêre vrumelich
0,1852 sît wart unde nützelich
0,1853 er sprach in trôstlichen zuo
0,1854 “ô . ir mîn vile lieben bruoder nû
0,1855 habet trôst zuo gote ein êrlich schar
0,1856 ir habet nû nemet des ebene war
0,1857 durch die liebe der meide sunes
0,1858 swenne sô sich ûf strît mit uns
0,1859 bekumben die Sarrazîne
0,1860 sô sulet ir hindene an in sîn
0,1861 durch got âne verdriezen
0,1862 mit helmbarten unde mit spitzen

0,1863 ir varet der orse under in
 0,1864 unde ouch swâ sie iuch zuo râme sîn
 0,1865 schônet ir niht wande sie vîande
 0,1866 garlîche unser sælden sint”
 0,1867 dem hêrren sageten sie alsô
 0,1868 sie wolten vroelîche strîten dô
 0,1869 durch ire sêle heil zuo êren gote
 0,1870 ouch dâ sîn nâch sînem gebote
 0,1871 der hêrre in neic unde sagete in
 0,1872 “gewis sulen wir des siges sîn”
 0,1873 zuo al den hêrren er sprach
 0,1874 waz er der bî im sach
 0,1875 “iuch hât der wære himelgot
 0,1876 her geladen unde sîn gebot
 0,1877 des geloube unde sîn almehticheit
 0,1878 wile hiute iuwer werdicheit
 0,1879 mêt hôhen unde ûf ziehen die
 0,1880 man hât iuch alsô vunden ie
 0,1881 swie ir mit werlîcher hant
 0,1882 wellt wern liute unde lant
 0,1883 die niht en erben . sie sîn ein lêhen
 0,1884 iuch von gote . ire wellt sie vêhen
 0,1885 starke unde zuo vîanden hân
 0,1886 die iuch betruobten dâr an
 0,1887 jâ haben wir hier dechein werntez wesen
 0,1888 ûf ein êwigez genesen
 0,1889 strîtet hiute vroelîche
 0,1890 umbe iuwer erbe daz himelrîche”
 0,1891 als er den trôst in gegap
 0,1892 “des helfe uns daz heilige grap”
 0,1893 nâch dem kyrielêison
 0,1894 si sungen gote den sîezen dôn
 0,1895 die Walhe ouch mit dem kûninge vrô
 0,1896 iren leisen sungen . dô
 0,1897 dâ mit sie alle zugen ire swert
 0,1898 in beiden hern die kristene wert
 0,1899 die vîande in starke zugen zuo
 0,1900 einander si wâren sô nâhen nû
 0,1901 die kristene ouch die Sarrazîne
 0,1902 diz mohte anders niht gesîn
 0,1903 der strîten en muoste samenen sich
 0,1904 zwischen den scharn manlich
 0,1905 die vore geschicket wâren
 0,1906 in vîantlîchen gebâren
 0,1907 einander sich besuochten die
 0,1908 ire sper mit kraft vertâten sie
 0,1909 des die heidene niht wole genuzen
 0,1910 ir pfil vile ouch dâ verschuzzen

0,1911 die schützen manlîchen gar
0,1912 ire swert sie vuorten bar
0,1913 als si den heidenen truogen haz
0,1914 wole tet dem lantgrâven daz
0,1915 mit der spitze er volgete nâch
0,1916 die schützen er von den vîanden brach
0,1917 er sprach “ir habet iz guot getân
0,1918 ir sulet iuch in die rote hân”
0,1919 als er in sagete sie tâten daz
0,1920 mit vollem hurte vürebaz
0,1921 an die vîande der vürste drukte
0,1922 die banier mit kraft nâch rukte
0,1923 unde gar die nâch der wâren
0,1924 mit herten slegen swâren
0,1925 unde mit werlîcher hant
0,1926 von den kristenen an gerant
0,1927 unde bekumbert dâ sîn
0,1928 die strît gernten Sarrazîne
0,1929 die mit swâren slegen herten
0,1930 manlîchen werten
0,1931 als helde ire prîs ouch ire leben
0,1932 in was zuo werke dâ gegeben
0,1933 zuo beiden teilen als iz in lac
0,1934 nieman dâ der muoze pflac
0,1935 die kristene als ein mûr zuo wer
0,1936 dâ hielten . ûf . si . der heidene her
0,1937 dranc gar krefticlîche
0,1938 daz wider drukten – herticlîche
0,1939 der lantgrâve mit kraft
0,1940 mit im die werde ritterschaft
0,1941 nieman mac mir gesagen daz
0,1942 ob iz ie getæten baz
0,1943 ie hêrren ûf der erden
0,1944 als iz gar die werden
0,1945 in strîte dâ tâten
0,1946 die sich dâr gesamenet hâten
0,1947 in aller wîse ritterlîche
0,1948 vore den vîanden sie ûf hielten sich
0,1949 in der heidene vluot verzwicket
0,1950 zuosamene mit in gericket
0,1951 unde betwungen in einen – kuppel
0,1952 von beiden hêrren die vrenchen tropel
0,1953 mit starken slegen betwungenlich
0,1954 unde alsô starke sie drungen sich
0,1955 er muoste gar kleinvüege sîn
0,1956 der sich dâ solte twingen în
0,1957 alsô stuont der strît in stæte
0,1958 als vore den vuo zgênden hæte

0,1959 der lantgrâve gesprochen zuo
0,1960 alsô wâren hinden nû
0,1961 an die vîande kumen die
0,1962 ors unde man sluogen sie
0,1963 êr si ir wurden gewar
0,1964 ein michel vach der vîande schar
0,1965 hetten sie zuo vuoze brâht
0,1966 ouch tôt gevalt . mit ire maht
0,1967 sluogen vile der heidene die
0,1968 ouch wurden sêre geletzet sie
0,1969 iedoch der vîande vile mêr
0,1970 orsen ouch den liuten wê
0,1971 sie tâten mit hertem strîte gar
0,1972 der lantgrâve der heidene schar
0,1973 ritterlîchen durch brach
0,1974 mit grôzer nôt iz doch geschach
0,1975 die edelen kristene wolegemuot
0,1976 ir aller harnasch der was guot
0,1977 des dâ wole genuzzen die
0,1978 manlîchen quecke striten sie
0,1979 swer des lantgrâven erbeitte
0,1980 den tôt hæte er bereite
0,1981 die Sarrazîne doch herten
0,1982 noch an dem strîte vaste sie werten
0,1983 sich . si en wolten vlieden niht
0,1984 rîche ire zimierde von steinen lieht
0,1985 dâ rihten acker unde vurch
0,1986 beneben ûz unde wider durch
0,1987 der kristene banier vuor mit kraft
0,1988 Ludewîc durchreit die heidenschaft
0,1989 mit gewalt unde in unsiten
0,1990 biz ûf die jene die noch striten
0,1991 mit der vuozgênden schar
0,1992 als der der hêrre wart gewar
0,1993 er trôste sie unde sprach zuo in
0,1994 “ir wert iuch lîben bruoder mîn
0,1995 ich gelobete iuch den sige den habet ir
0,1996 nû machet iuch rûm her zuo mir”
0,1997 als er in hæte alsô gesaget
0,1998 vrechgemuot unde unverzaget
0,1999 mit ire wer die sie truogen
0,2000 sie stâchen unde sluogen
0,2001 an die werlîchen heidene nû
0,2002 den gap ouch starke der – vürste zuo
0,2003 der sînen zuo vuoze was vile erslagen
0,2004 doch mêr . der heidene die nû zagen
0,2005 begonden als sie des die nôt
0,2006 twanc unde der herte tôt

0,2007 swaz ir dâ was noch geriten
 0,2008 des hêrren die dâ niht erbiten
 0,2009 die vluht verhouwen sêre doch
 0,2010 ir vile gâben dâr . dâ noch
 0,2011 Levi streit ire houbetman
 0,2012 den der lantgrâve Herman
 0,2013 noch starke mit strîte müejete dâ
 0,2014 dem lantgrâven was ouch gâh
 0,2015 als er den vliehenten jagete nâch
 0,2016 volgen man dem vürsten sach
 0,2017 die edelen grâven vestgemuot
 0,2018 unde manigen werden ritte guot
 0,2019 ouch die vuozgênden man
 0,2020 sie hetten grôzen mort begân
 0,2021 an orsen ouch an den heidenen hier
 0,2022 nâch in gestrôuwet lâgen die
 0,2023 ûf dem velde dicke
 0,2024 in jâmerigem blicke
 0,2025 // wole markte daz der vürste
 0,2026 swie in – gedurste
 0,2027 nâch der vîande banier streit
 0,2028 sîn bruoder in voller herticheit
 0,2029 als er wolte erkriegen die
 0,2030 unde den heidenen zuo laster sie
 0,2031 zuo der erden bringen
 0,2032 den sige alsô erringen
 0,2033 mit im gar die werden
 0,2034 gelîche des begerten
 0,2035 alsus der markgrâve von Paden
 0,2036 tet den vîanden grôzen schaden
 0,2037 dem gelîch âne allez wanken
 0,2038 grâve Poppe mit sînen Vranken
 0,2039 ich meine den hêrren von Hennenberc
 0,2040 er worhte dâ manlîche werc
 0,2041 Florentius von Hollant
 0,2042 dâ mit werlîcher hant
 0,2043 sluoc vile der Sarrazîne tôt
 0,2044 sîn bruoder tet in die selbe nôt
 0,2045 grâve Otto von Bintheim
 0,2046 daz selbe tet hêrr Huc von Wertheim
 0,2047 die kristene gemeinlîche
 0,2048 die striten manlîche
 0,2049 ouch wolten die heidene
 0,2050 ungerne von prîse scheiden
 0,2051 des beleip ir dâ maniger tôt
 0,2052 die kristene ouch von in liden nôt
 0,2053 sie sluogen dise man sluoc ouch sie
 0,2054 nû sach der werde Ludewîc swie

0,2055 beidersât in manheit siten
0,2056 die kristene ouch die heidene striten
0,2057 mit den die im lâgen zuo
0,2058 in vollem hurte drukte er nû
0,2059 ûf der heidene ritterschaft
0,2060 die er starke mit voller kraft
0,2061 biz an ire baniere durchreit
0,2062 dâr gegen ouch der bruoder streit
0,2063 die hêrren mit vollem strîte nû
0,2064 gâben mannelîchen zuo
0,2065 den vîanden Ludewîc manigen frâl
0,2066 unde manigen tiuwern amiral
0,2067 durch lieht zimierde die er truoc
0,2068 von dem orse dâ nider sluoc
0,2069 von Pleien grâve Liutolt
0,2070 daz er den vîanden was abeholt
0,2071 manlîche er daz bewîste in
0,2072 manic werlîcher Sarrazîn
0,2073 lac dâ tôt von sîner kraft
0,2074 quâmen sie dar durch amorschaft
0,2075 oder durch minnegeltes lôn
0,2076 dâ schieden sie die kristene von
0,2077 grâve Kuonrât von Moseburc
0,2078 sluoc dâ manigen vrenchen Turc
0,2079 tôt zuo der erden
0,2080 alsô tâten ouch die werden
0,2081 von Swarzburg manlîche die striten
0,2082 nôt die vîande von in liten
0,2083 swaz dâ der werden wâren
0,2084 gemeine sie wolten varen
0,2085 der Sarrazîne als sie des nôt
0,2086 twanc unde ire manheit in gebôt
0,2087 sie wolten gelîche guote ritter sîn
0,2088 des entgulten sêre die Sarrazîne
0,2089 an ire banier voget Witege
0,2090 gegen den vîanden der unsitige
0,2091 was nû kumen dem manlîche nâch
0,2092 lantgrâve Herman mit al der rote brach
0,2093 ouch der herzoge von Meran
0,2094 vile grâven unde die begebenen man
0,2095 vaste ûf die banier drungen nû
0,2096 Ludewîc ouch andersât in zuo
0,2097 starke grâve Burchart
0,2098 bî im sîn bruoder Gebehart
0,2099 als rehte helde manlîche gar
0,2100 mit vollem hurte drukten dar
0,2101 ich wile die rede kurz iuch sagen
0,2102 der sie vuorte er wart erslagen

0,2103 doch ein werlîcher ritter hart
0,2104 die banier nider gebrochen wart
0,2105 untrôst daz den heidenen gap
0,2106 “nû helfe uns daz heilige grap”
0,2107 die edelen kristene sunge dô
0,2108 ouch ire krîe sie riefen vrô
0,2109 die heidene wichen hinder sich
0,2110 unde noch dannoch werlîche
0,2111 aldâ sie westen Salatîn
0,2112 mit strîte Ludewîc volgete in
0,2113 nâch sînem willen iz im gie
0,2114 nû quâmen im die mære swie
0,2115 Gwidô vore Salatînen
0,2116 vüere vlühtic unde die sînen
0,2117 ouch mit im die Franzoisære
0,2118 unde gar die Lampartære
0,2119 unde swie der soldân von Babilô
0,2120 vlühtic si jagete dô
0,2121 swaz der kristenlîchen kinde
0,2122 zuo vuoze dâ gewesen sint
0,2123 den Walhen geordenet zuo
0,2124 die liezen sie âne helfe nû
0,2125 die wurden an dem nâchjagenen
0,2126 sêre verwunt unde erslagen
0,2127 ir quam der drîzigeste niht hin
0,2128 ouch wart vile der Sarrazîne
0,2129 von den gênten tôt geslagen
0,2130 die muosten lâzen daz nâchjagen
0,2131 hæte Gwidô alsô herticlîche
0,2132 gewert mit den Walhen sich
0,2133 als die zuo vuoze dâ tâten
0,2134 die si doch zuo helfe hâten
0,2135 sô en mohte vore in Salatîn
0,2136 noch die sînen niht belîben sîn
0,2137 als Lêvi vore dem lantgrâven tet
0,2138 ûf die vluht sich der nû hæte
0,2139 geriht mit den sînen
0,2140 noch den Sarrazînen
0,2141 der vürste mannelîchen jagete nâh
0,2142 zuo im der hûchmeister dâ
0,2143 rante er sprach im alsô zuo
0,2144 “hêre dem orse enthaltet nû
0,2145 en jaget niht mêt iz ist – guot
0,2146 alzuo sêre ir müeden tuot
0,2147 die ors daz volc hier beitet ir
0,2148 biz daz zuosamene kumen wir
0,2149 sô vrâget ir die hêren waz
0,2150 in gevalle . unde tuo man daz

0,2151 ir sehet swie der küninc vliuhet
0,2152 swie gar sich nâch im ziuhet
0,2153 Salatîn der soldân”
0,2154 der lantgrâve sprach “daz sî getân”
0,2155 er enthielt dem orse unde sprach alsô
0,2156 “daz der küninc Gwidô
0,2157 mit der vluht unêrt die kristenheit
0,2158 daz ist mir ganzlîchen leit
0,2159 sprechet waz sî daz bezziste nû
0,2160 des grîfe man endelîchen zuo”
0,2161 zuosamene sie wâren kumen dô
0,2162 ir aller antwûrte stuont alsô
0,2163 “allez daz an grîfet ir
0,2164 des wellen hêrre helfen wir”
0,2165 gar in betrüebeten muote
0,2166 der manlîche dâ bî der guote
0,2167 sprach . “dem küninge mit kraft
0,2168 der soldân mit der heidenschaft
0,2169 manlîche nâch gevolget hât
0,2170 biz an der herberge stat
0,2171 als ir wole sehet in vîandes sîten
0,2172 wirdet daz von uns niht widerriten
0,2173 wirdet der küninc vlühtic vürebaz
0,2174 unde behelt dirre die herberge . daz
0,2175 muoz uns ein êwic laster sîn
0,2176 daz ist mîn rât wir ziehen dâ hin
0,2177 als uns got hât gesamenet hier
0,2178 zuo helfe den unsern waz ob sie
0,2179 unser künfte troesten sich
0,2180 unde kêren wider manlîche
0,2181 gegen den vîanden in den strît
0,2182 gevellet iuch der rât . sô ist des zît
0,2183 daz wir uns snelle machen dar
0,2184 nâch uns sî der vuo zgênden schar
0,2185 wande iz mac alsô geschehen
0,2186 sô uns die jene kêren sehen
0,2187 die vore uns nû vlühtic sîn
0,2188 daz sie denken wir wîchen in
0,2189 unde ziehen uns nâch . den sî zuo wer
0,2190 unde wider zuo vuoze gênte daz her
0,2191 den helfe mîn bruoder Herman
0,2192 ouch mîn swâger Bertolt von Meran
0,2193 mit in der markgrâve von Baden
0,2194 als er ouch gert der heidene schaden
0,2195 mit den drîn vürsten iren mannen
0,2196 unde waz si hier der werden hân
0,2197 waz der andern hêrren sî
0,2198 den wile ich vore wesen bî”

0,2199 gemeine si riefen dô
0,2200 iz solte wesen alsô
0,2201 unde si wolten âne betrâgen
0,2202 sich in gotes êre dâ wâgen
0,2203 vrô mit der rede hin stapfeten si
0,2204 dô sie sach kêren Lêvi
0,2205 er hæte ouch wider gesamenet sich
0,2206 er dâhte sie vluchen zagelîche
0,2207 unde swie der sige wære sîn
0,2208 er sprach “sehet die kristene ziehen hin
0,2209 den sige haben sie verloren”
0,2210 swaz sie dâ heidenischer horne
0,2211 in ire her noch hâten
0,2212 erschellen sie die tâten
0,2213 die busûnen tambûr ire krîen
0,2214 sie begonden starke schrîen
0,2215 in hôchvart als vore der vürste sprach
0,2216 ûf strît zugen si im nâch
0,2217 alsô muoste daz gotes her
0,2218 sich dâ setzen zuo wer
0,2219 vorne unde ouch zuorügge
0,2220 mit kraft poinders drucke
0,2221 als der vürste in die lêre gap
0,2222 “helfe uns daz heilige grap”
0,2223 sie lûter stimme sunge hôch
0,2224 manlîche ûf die heidene sô
0,2225 der lantgrâve quam geriten
0,2226 als die noch mit dem künige striten
0,2227 swaz si dem zuo leide tâten
0,2228 unde die sînen genoetet hâten
0,2229 mit vollem strîte manicvalt
0,2230 in der lantgrâve nû daz galt
0,2231 ouch mit im gar die werden
0,2232 als si des zuo gote gerten
0,2233 er solte ire dienestes lôn in
0,2234 si sparten niht die Sarrazîne
0,2235 gâben êr goltvarwen schîn
0,2236 alsô si die zugeten in
0,2237 ire schilde ire zimier . ire harnasche
0,2238 ire wâfenkleit der verlasch
0,2239 von ire bluote rôtgevar
0,2240 die wâren nû jâmeric gar
0,2241 von ire bluote bevlozen
0,2242 unde maniger wegen begozzen
0,2243 jâ en wolten die edelen kristene
0,2244 niht die heidene vristen
0,2245 wâren si der kristenheit gehaz
0,2246 nû galt in der vürste daz

0,2247 mit der werlîchen ritterschaft
0,2248 sich werte ouch starke die heidenschaft
0,2249 ir was vile . der soldân
0,2250 was selbe ein werlîcher man
0,2251 jâ en wolte er selbe daz
0,2252 iz ieman dâ tete vore in baz
0,2253 als ein reht helt er streit
0,2254 mit dem grâven er zuosamene reit
0,2255 von Arnstein der ouch sich
0,2256 werte sîn dâ manlîche
0,2257 sie tâten beide einander nôt
0,2258 under dem grâven stach dâ tôt
0,2259 daz ors . der von Babilô
0,2260 Walthar zuo vuoze sich muoste dô
0,2261 wern ob er wolte genesen
0,2262 waz solte er tuon iz muoste wesen
0,2263 swære iz gar dem hêrren lac
0,2264 er entvienc dâ manigen slac
0,2265 sîn guot harnasch in nerte
0,2266 als ein helt er sich noch werte
0,2267 ouch wart er ungevuoge gar
0,2268 gehurt her unde dar
0,2269 dâ von im wê gar geschach
0,2270 ein sîn ritter in ersach
0,2271 hêrr Alber von Arnstete
0,2272 den er mit im brâht dar hæte
0,2273 getriuwe ein helt erwegen gar
0,2274 er kriegte zuo dem hêrren dar
0,2275 zuo im der ritter werde .
0,2276 erbeizte ûf die erde
0,2277 vore den hêrren zuo der nôt
0,2278 er sich manlîche dâ bôt
0,2279 ûf sîn ors doch brâhte er in
0,2280 er wolte pfant vore in sîn
0,2281 den hêrren hiez ab rîten er
0,2282 sêre zuoquetzet sô was der
0,2283 von slegen wunder iz was
0,2284 daz der hêrre ie genas
0,2285 dâ stuont als ein helt Alber
0,2286 wolegemuot was des er
0,2287 daz er lebente hette hin
0,2288 abe brâht den hêrren sîn
0,2289 al stênte er wê den heidenen tet
0,2290 der lantgrâve daz gesehen hæte
0,2291 wie hêrr Alber vür den hêrren trat
0,2292 wie er im abe geholfen hât
0,2293 wie er zuo vuoze mit kraft dâ streit
0,2294 im was sîn verderben leit

0,2295 als er sich des lebenes hæte
0,2296 erwegen . grôzen mein tet
0,2297 den heidenen Alber unde ungemach
0,2298 der lantgrâve ouch ûf sich dringen sach
0,2299 einen der heidene hôchgemuot
0,2300 ein ors kreftic envollen guot
0,2301 reit der stolze Babilôn
0,2302 den sluoc der vürste dâ von
0,2303 tôten ûf die erde
0,2304 daz ors begreif der werde .
0,2305 durch gar grôzen gedranc .
0,2306 mit gewalt gar âne der heidene danc
0,2307 als er im helfe gedâhte
0,2308 dem ritter er daz brâhte
0,2309 unde half dem snelle dâr ûf
0,2310 leit daz den Sarrazînen schuof
0,2311 wande ir der helt von Arnstete
0,2312 decheine schône mêt hæte
0,2313 swer sô im zuo râme quam
0,2314 den tôt von im gewis der nam
0,2315 im half der lantgrâve bî zît
0,2316 herte gar was der strît
0,2317 Ludewîc truoc den heidenen nît
0,2318 hindene vorne unde besît
0,2319 mit kraft ire rote er durch brach
0,2320 disen er sluoc . jenem er stach
0,2321 daz ors . er brâhte ir vile dâr nider
0,2322 die sich des mit nihte wider
0,2323 mohten berihten noch mêt erholen
0,2324 sie en muosten ein bitter sterben dolen
0,2325 iz en brâhte der diutischen decheiner dâr
0,2326 an im zageheit mit der ein hâr
0,2327 man mohte zuo widerwechsele wegen
0,2328 si hetten sich alle des erwegen
0,2329 sie wolten in gote ersterben
0,2330 oder den sic erwerben
0,2331 an sînen vîanden mit kraft
0,2332 den soldân die starken heidenschaft
0,2333 als er ein manlich herze truoc .
0,2334 mit gewalt er zuorügge sluoc .
0,2335 der mannelîche Ludewîc .
0,2336 von den herbergen . ouch hæte den sige
0,2337 lantgrâve Herman unverzaget
0,2338 an Lêvi mit strîte bejaget
0,2339 beidersît sie vluhen nû
0,2340 an beiden teilen in starke zuo
0,2341 die kristene unde vîantlîche satzten
0,2342 an der vluht si sêre latzten

0,2343 hier Ludewîc nâch Salatîne
0,2344 dort Herman der helfær sîne
0,2345 der Sarrazîne sluogen vile
0,2346 hier mit ire strît ich lâzen wil
0,2347 iz würde zuo lanc solte ich ez iuch sagen
0,2348 swie dirre unde jener würde erslagen
0,2349 der kristene wart dâ vile gevalt
0,2350 dâ wider der heidene ungezalt
0,2351 lâgen dâ manigen enden tôt
0,2352 der sêle zuo der helle liten nôt
0,2353 der kristene sêle zuo himele vrô
0,2354 wesen als si ez verdienten dô
0,2355 des sî dir iemer mêre
0,2356 got hêrre lop unde êre
0,2357 der lantgrâve hæte gejaget noch
0,2358 wen daz in des diz widerzôch
0,2359 daz al den tac sie garlîche
0,2360 die ors unde ouch selben sich
0,2361 hetten gemuot zuo sêre
0,2362 daz twanc si der widerkêre
0,2363 daz selbe sîn bruoder Herman
0,2364 tet mit dem von Meran
0,2365 unde mit dem markgrâven von Baden .
0,2366 in beiden hern sie hetten schaden
0,2367 an den liuten genomen
0,2368 diz mohte niht anders zuo kumen
0,2369 gewin unde verlust gibet der strît
0,2370 iz mohte nû wesen zît
0,2371 ob sie iht hâten daz sie sâzen
0,2372 die hêrren unde daz âzen
0,2373 sie vunten bereit kleinez maz
0,2374 schiere was verzeret daz
0,2375 den versêret schuof man gemach
0,2376 Ludewîc in selbe zuo sach
0,2377 er trôste sie wole in daz tet
0,2378 ein suozgemuotez herze er hæte
0,2379 dâr als er ouch gebôt
0,2380 die in strîte wâren tôt
0,2381 die wurden snelle vore naht
0,2382 bî daz her zuosamene brâht
0,2383 als sie in gotes êre getoetet
0,2384 in ire bluote – durch in gerôtet
0,2385 die pfafheit vigilje sanc dâ in
0,2386 die bischove wolten selbe dâ sîn
0,2387 sie wurden mit êren bewachet
0,2388 in grôzer andâht in wart gemachet
0,2389 ein gruobe bî dem mer besît
0,2390 noch zuo tief noch zuo wît

0,2391 von Mîsne bischov Mertîn
0,2392 gote zuo êren zuo trôste in
0,2393 sanc eine schoene messe gar
0,2394 voller stimme unde offenbâr
0,2395 von al der pfafheit wart dô
0,2396 daz ambahte volbrâht alsô
0,2397 swaz der bischove unde der priester was
0,2398 iegelicher dâ eine messe las
0,2399 dâr nâch mit grôzen êren . die
0,2400 tôten heilic bestateten sie
0,2401 als der lantgrâve die lêre gap
0,2402 ein tiefer grabe umberinget daz grap
0,2403 als er daz wolte unde schuof
0,2404 daz dechein viehe gienge dâr ûf
0,2405 in zuo heile Christô zuo lobe
0,2406 ein kriuze hôhe geriht dâr obe
0,2407 ouch hiez zuosamene Salatîn
0,2408 tragen die tôten Sarrazîne
0,2409 in einem vride diz geschach
0,2410 unde niur durch daz man den sprach
0,2411 daz ûf den velden swâ si wolten
0,2412 beidersît die tôten holeten
0,2413 als man uns von den heidenen seit
0,2414 swie daz sî ire gewoneheit
0,2415 wenne sô daz sterben die
0,2416 wie daz ire vriunde verbürnen sie
0,2417 dem selben tet dô geliche Salatîn
0,2418 alle die tôten Sarrazîne
0,2419 als si wâren dâ erslagen
0,2420 hiez er manigen enden tragen
0,2421 zuo houfe unde verbürnen die
0,2422 ire gewoneheit in die haben sie
0,2423 ire gelouben unde ire leben
0,2424 denne sô ist daz wole ebene
0,2425 der lantgrâve durch sîn hövischheit
0,2426 mit den werden ûz sînem her reit
0,2427 zuo dem künige Gwiden er klagete
0,2428 in . ouch er im sagete
0,2429 “hêrre die wîle unde wir . mit
0,2430 Salatîne sîn gevidet
0,2431 ob iz iuch ist behegelich
0,2432 iz dunket wole nütze wesen mich
0,2433 die wîle man des die muoze habe
0,2434 daz ein eteslich man sich umbe grabe
0,2435 als wir hier gelegen sîn
0,2436 daz nâch dem vride Salatîn
0,2437 uns in die herberge renne niht
0,2438 des vürenamens vile geschihet

0,2439 swâ gegen einander [!!] zuo wer
0,2440 die liute samenen sich mit her
0,2441 er ist sô gar erwegen ein man
0,2442 er sol iz kûme gelân
0,2443 als ich habe sîn rîten
0,2444 gesehen . unde sîn strîten
0,2445 sô merke ich ganzlîchen in
0,2446 volkomen grôzer manheit sîn
0,2447 er vuorte ouch gar herte ritterschaft
0,2448 wir entsitzen billîche ire kraft
0,2449 hunde manige vellen tier
0,2450 doch wellen uns ir weren wir”
0,2451 der küninc sprach dem vürsten zuo
0,2452 “iz ist wole guot daz selbe man tuo”
0,2453 iz was ouch garlîche
0,2454 den hêrren behegelych
0,2455 dâ greif mannelich edele man
0,2456 die arbeit türsticlîchen an
0,2457 des wolte nieman sîn verhaben
0,2458 er ne wolte ûz werfen oder graben
0,2459 der vürste der grâve . die rede ist sleht
0,2460 der vrîe der ritter ouch der kneht
0,2461 tiefe wîte graben snellîche
0,2462 sie dô zugen umbe sich
0,2463 dâr nâch werlîche ûf die
0,2464 starke ziune vlâhten . sie
0,2465 arbeiten tac unde naht
0,2466 biz daz sie hetten daz zuo brâht
0,2467 von ire mastboumen hôhe enbore
0,2468 sie satzten bercvride ob die tor
0,2469 die wurden vlîzic gar bewachtet
0,2470 sie hetten in legers dâ gedâht
0,2471 die bischove vür suone daz sazten in
0,2472 unde bâten sie vrô in gote sîn
0,2473 ire erbe solte sîn der himelhov
0,2474 Gotevrit der bischov
0,2475 von Wirzeburc mit voller lêre
0,2476 in offenbârte die himelêre
0,2477 unde sagete mit süezer bredigât
0,2478 alsô tet der bischov Kuonrât
0,2479 von Regensburc ein heilic man
0,2480 er was . unde lac den werden an
0,2481 daz sie wolten wesen vrô
0,2482 unde erliezen sich niht verdriezen dô
0,2483 ouch wâren ire lebenes reine
0,2484 die bischove gemeine
0,2485 doch in manlîchen getürsten
0,2486 unde in gote wîse vürsten

0,2487 dem volke ein trôst wâren sie
0,2488 iz geschach ich sage iuch swie
0,2489 swâ man sich von der arbeit
0,2490 lât . unde gibet der müezicheit
0,2491 von sachen maniger hande
0,2492 wirdet dâ manic ande
0,2493 mit rede gerochen unde beriht
0,2494 der werdicheit diz vüezet niht
0,2495 alhier ein gelîchez dem geschach
0,2496 dâ was manic man der sprach
0,2497 swie der markîs von Montverrân
0,2498 Kuonrâte hæte lasterlîche getân
0,2499 sô daz er in niht helfe tet
0,2500 sie sprâchen daz er genomen hæte
0,2501 dâr umbe des soldânes golt
0,2502 daz er stille sitzen solte
0,2503 waz sô der was die sprâchen diz
0,2504 der lantgrâve sprach “sie lâzen iz”
0,2505 er sprach “iz stêt iuch übel an
0,2506 unde ist niht ritterlîche getân
0,2507 lât die rede iz vüezet wole
0,2508 ûf den markîs nieman niht reden sol
0,2509 wer weiz wâr umbe iz ist geschehen
0,2510 daz er sitzet stille ich wile besehen
0,2511 ob ich in müge bringen her
0,2512 ich hoffe er ervülle mîne ger
0,2513 ein manlich helt sînes râtes wîs
0,2514 ûf alle sache der markîs
0,2515 ist . unde von ritterlîcher tât
0,2516 daz er vile bewîset hât
0,2517 an sînen vîanden dâ er streit
0,2518 hier mit ist sîn werdicheit
0,2519 niht hin geleet ob er uns kumet
0,2520 als ich des hoffe wole uns daz vrumet
0,2521 wir wollen sîn wole getroestet sîn”
0,2522 mit sînen brieven gruozte er in
0,2523 dâr an er vant geschriben sô
0,2524 “iuwer sælden bin ich vrô
0,2525 hêrre iz ist besunder
0,2526 ein übergrôzez wunder
0,2527 unde seltsæne mir
0,2528 als ich daz weiz an iuch daz [!] ire
0,2529 ie bî manheit wesen woltet
0,2530 unde hôhen swâ ir soltet
0,2531 iuwarn vürstlîchen prîs
0,2532 geloubet mir hêr markîs
0,2533 Willhelm der werde iuwer vater
0,2534 mit nihte daz verlâzen hât er

0,2535 als er was an manheit veste
0,2536 ob er im sô nâhen weste
0,2537 die gotes dienær lîden nôt
0,2538 ob er halt dâ holen den tôt
0,2539 oder schaden nemen solte
0,2540 wesen er dâ wolte
0,2541 unde sich dâ bewîsen als ein man
0,2542 ouch erbit iuch manheit von im an
0,2543 sol die an iuch wahsen abe
0,2544 daz ist mir leit vûr wâr ich ez habe
0,2545 und ich in weste sô gar erwegen
0,2546 iz en hæte ouch Willhalm niht verlegen
0,2547 iuwer bruoder dem genâde got
0,2548 geloubet mir swâ ich iuch weste in nôt
0,2549 als wir nû gegen den heidenen sîn
0,2550 ich quæme iuch ungesûmet dâ hin
0,2551 sît uns ein helfe ein dienst gote
0,2552 nâch iuwer werdicheite gebote
0,2553 sît ire iemanne gehaz
0,2554 niht rechet an iuwer m prîse daz
0,2555 den nidert niht ." als er gelas
0,2556 der markîs als im entboten was
0,2557 in im selben jach er des sân
0,2558 wie daz er hette missetân
0,2559 er schreip dem lantgrâven hin
0,2560 er wolte im zuo helfe sîn
0,2561 des was der tugentlîche vrô
0,2562 er sagete iz gar den werden dô
0,2563 markgrâve Kuonrât niht en sûmete sich
0,2564 zuosamene gar ein werlich
0,2565 her . er brâhte ouch mit im dar
0,2566 quam ritterlîcher verte gar
0,2567 der grâve von Monterâl Reinolt
0,2568 als er gote bezzern wolte
0,2569 des er vore sich vergaz
0,2570 an den heidenen wolte er daz
0,2571 in strîte rechen mit kraft
0,2572 sie brâhten werde ritterschaft
0,2573 georset starc gezieret rîche
0,2574 sie leiten zuo dem lantgrâven sich
0,2575 der in grôzer wirde sie
0,2576 unde vollen vroelich entvie
0,2577 an in ervuor der wîse daz
0,2578 wâr umbe sie dem künige wâren gehaz
0,2579 daz benam er mit sîezer rede in
0,2580 unde leite daz aller dinge hin
0,2581 nû wart des langer niht gebiten
0,2582 er schuof daz si zuosamene riten

0,2583 einander helfe gelobeten . vrô
0,2584 was ir der küninc Gwidô
0,2585 alsô was ouch gar daz gotes her
0,2586 in quam nû koste ûf dem mer
0,2587 von Kriechen Venedie rîche gar
0,2588 von Genuê manigen enden dar
0,2589 sô brâhten rîche koufman die
0,2590 als dâr an wolten gewinnen sie
0,2591 der wart rîche daz her berâten
0,2592 die zwêne die vore hâten
0,2593 gefangen lantgrâve Herman
0,2594 der starctürstiger man
0,2595 unde grâve Liutolt an ire tjoste
0,2596 ûf der warte . der koste
0,2597 einen grôzen teil gulten die
0,2598 der soldân mit golde lôste sie
0,2599 sie lâgen nû alle sicher mêr
0,2600 danne sie getân hetten êr
0,2601 sît sich der vürste Kuonrât
0,2602 in ire helfe gezogen hât
0,2603 mit im der von Monterâl
0,2604 Reinolt der manlîche frâl
0,2605 Ludewîc hæte eine gewoneheit
0,2606 daz er gerne zuo Gwiden reit
0,2607 dem küninge zuo êren tet er daz
0,2608 unde ouch alsô daz er die baz
0,2609 gegen den vîanden wêrlîche
0,2610 mit den sînen hette sich
0,2611 von im selben ein ûzerwelt
0,2612 was gar ein manlîcher helt
0,2613 sînes muotes veste Gwidô
0,2614 wæren ouch bî im gewesen sô
0,2615 die an sînem ringe lâgen
0,2616 unde hârslihtenes pflâgen
0,2617 er hæte die Franzoisære
0,2618 alle Wâlden Burgundære
0,2619 under in allen doch lief daz mære
0,2620 daz niht bezzer ritter wære
0,2621 danne der lantgrâve von Düringen
0,2622 ouch der herzoge von Lutringen
0,2623 jach im des mit al den sînen dô
0,2624 ouch hetten in gar die diutischen sô
0,2625 noch sô sageten sie dâ bî
0,2626 daz er ein guot geselle sî
0,2627 geweset mit den rittern wünniclich
0,2628 vrô . milte trôstlich
0,2629 daz zimet allen vürsten wole
0,2630 diz bî ire wirde wesen sol

0,2631 als mir zuo wizzenne ist getân
0,2632 unde die rede ich vernomen hân
0,2633 niht von mir selben ich die sage
0,2634 vore vesperzît nâch mittem tage
0,2635 iz was dâ mit Kuonrâte
0,2636 des worden zuo râte